

Mark He Likha Bhal Khobor

Baptizma Diya John Pora Rasta Taiyar Kora

¹ Isor laga Putro, Jisu Khrista laga susamachar eneka shuru huwa ase,

² Jineka Isaiah bhabobadi pora likhise,
 “Sabi, tumikhan laga age te Moi khobor bukha manu ke pathai ase,

Etu ekjon kun tumikhan nimate rasta taiyar kori dibo*.

³ Ekjon jongol te jor awaj pora mati ase,
 ‘Probhu nimate rasta to bonai lobi;
 Aru Tai laga rasta ke sidha rakhi bhi.’ ”

⁴ Jongol te John ulai ahise aru baptizma dikene mon ghurabole aru paap pora khyama pabo nimate prochar korise. ⁵ Judea laga pura desh aru Jerusalem sheher laga manu khan tai logote jaise. Taikhan ke Jordan Nodi te loi jaise aru taikhan paap shikar kora pichete taikhan ke baptizma dise. ⁶ John laga kapra to uth laga chamra pora bona kapra thakise aru chamra laga peti tai laga komor te bandi kene thakise, aru tai phoring aru jongol mou laga pani khai thakise.

⁷ Tai eneka prochar korise, “Ekjon ahibole ase aru Tai moi pora bhi bisi takot ase, aru moi niche jhukikena Tai laga juta khuli dibole bhi layak nai. ⁸ Moi tumikhan ke pani pora baptizma di

* **1:2** 1.2 Mal. 3:1; Mat. 11:10; Luke 7:27. † **1:3** 1.3 Isa. 40:3.

ase, kintu Tai tumikhan ke Pobitro Atma pora baptizma dibo.”

Jisu Baptizma Luwa

⁹ Etiya eneka hoise olop din pichete Jisu Nazareth town pora Galilee laga jagate ahise, aru John pora Taike baptizma dise. ¹⁰ Aru loge-loge, jitia Jisu pani pora ulai ahise, sorgo khuli kene Isor laga Atma ekta kopu chiriya nisena Tai uporte ahi thaka tai dikhise. ¹¹ Titia sorgo pora ekta awaj ahise, “Tumi Moi laga morom laga Putro ase, Moi Tumi uporte bisi khushi ase.”

Jisu Ke Porikha Kora

¹² Etu homoi te, Atma pora Taike jongol te jai jabole nimite koise. ¹³ Aru Jisu jongol te chalis din tak thakise, aru Taike Saitan pora porikha korise. Etu somoite Tai jongol laga janwar khan logote thakise, aru sorgodoth khan Taike sewa kori thakise.

Jisu Porisorja Shuru Kora

¹⁴ John ke dhuri loija pichete, Jisu Galilee laga jagate ahi kene Isor laga susamachar prochar korise. ¹⁵ Jisu prochar, “Etu homoi pura hoise, aru Isor laga rajyo usor hoise. Mon ghura bhi aru susamachar te biswas koribi.

Jisu Pora Prothom Chela Khan Ke Mata

¹⁶ Jitia Tai Galilee Nodi laga kinar te berai thakise, Tai Simon aru tai laga bhai Andrew ke nodi te jal phelai thaka dikhise, kelemane taikhan maas dhora manu asele. ¹⁷ Titia Jisu taikhan ke koise, “Ahibi, Moi laga pichete, aru Moi tumikhan ke manu dhori bole bonai dibo.”

¹⁸ Etu homoi te taikhan sob chari kene Jisu laga pichete jaise. ¹⁹ Aru jitia Jisu olop age te jaise, titia Tai James, aru tai laga bhai John ke dikhise. Tai duijon to Zebedee laga chokra thakise, taikhan maas dhura jal bonai thakise. ²⁰ Aru titia, Jisu taikhan ke matise, taikhan nijor baba aru kaam kora noukar khan ke naw te chari kene Tai laga pichete jaise.

Jisu Pora Dusto Atma Thaka Ekjon ke Changai Kora

²¹ Titia Jisu aru chela khan Capernaum town te ahise, aru Bisram laga dinte, Jisu mondoli te jai kene sikhaise. ²² Taikhan Jisu pora sikhai diya kotha huni kene asurit hoise, kelemane Tai niyom jani kene thaka manu nisena nohoi kene adhikar thaka ekjon nisena sikhai thakise. ²³ Etu homoi te, ekjon dusto atma pora dhori kene thaka mondoli te thakise, aru tai hala kori kene kandise, ²⁴ Aru koise, "Apuni moi khan logote ki kaam ase, Nazareth laga Jisu? Apuni moi khan ke khotom kori bole ahise naki? Moi jane Apuni Isor laga samachar koi dibole aha Pobitro Ekjon ase!" ²⁵ Kintu Jisu taike gali dikene koise, "Chup thakibi, aru tai pora ulai jabi!" ²⁶ Titia dusto atma taike nichete phelai dise aru jor pora hala kori kene kandise aru gaw pora ulai jaise. ²⁷ Titia sob manu khan etu dikhi kene asurit hoise, aru ekjon-ekjon ke hudise, aru koise, "Etu ki ase? Ekta notun adhikar pora sikhai diya! Tai dusto atma ke bhi hukum diye aru taikhan Tai laga kotha mane!" ²⁸ Aru etu laga khobor pura Galilee laga jagate joldi punchi jaise.

Jisu Pora Manu khan ke Changai Kora

²⁹ Aru etu pichete, Jisu aru Tai laga chela khan mondoli pora ulaikene ahi juwa pichete, taikhan Simon aru Andrew laga ghor te ahise, aru taikhan logote James aru John bhi thakise.

³⁰ Etu homoi te Simon maiki laga ama bukhar pora ghumai thakise, aru taikhan joldi pora jai kene etu Jisu ke koi dise. ³¹ Titia Jisu ahise, aru tai laga hath dhori, aru taikhe uthai dise. Titia bukhar tai pora jai jaise, aru tai uthikena taikhan ke sewa korise.

³² Jitia saam hoise, aru suryo nami jaise, taikhan bemaar thaka manu aru bhoot pora dhori kene thaka sob Tai usorte loi anise. ³³ Aru Capernaum sheher te thaka sob manu khan ahikena dorja usorte joma hoise. ³⁴ Aru Tai alag kisim laga bemaar thaka manu khan ke bhal korise, aru bhoot khan pora dhori kene thaka atma khan khedai dise, kintu Tai etu bhoot khan ke kotha kobole diya nai kelemane taikhan jani thakise Tai kun ase.

Jisu Galilee Te Prochar Kora

³⁵ Aru phojur nohua age te Tai joldi uthise, aru Tai ekla kun bhi nathaka jagate jai kene ta te prathana kori thakise. ³⁶ Titia Simon aru tai logote thaka khan Taikhe bisari ahise. ³⁷ Jitia taikhan Taikhe lok paise, taikhan koise, "Sob manu Apuni ke bisari ase." ³⁸ Kintu Tai taikhan ke koise, "Ahibi amikhan dusra nogor te jai jabo, ta te bhi Moi prochar koribo lagi ase." Kelemane Moi etu karone ahise. ³⁹ Aru Tai Galilee sob jagah te jai kene taikhan laga mondoli te prochar korise aru bhoot khan ke khedai thakise.

Kusto-rugi Bemar Thaka Ekjon Ke Sapha Kora

⁴⁰ Titia kusto-rugi bemar thaka ekjon Tai logote ahi kene athukari se aru anurodh kori kene Taike koise, "Jodi Apuni itcha hoile, moike sapha koribo pare." ⁴¹ Titia Jisu taike bisi morom lagise. Aru Tai laga hath uthaise, aru taike chuikena eneka koise, "Ami itcha ase. Sapha hoi jabi." ⁴² Aru loge-loge te kusto-rugi bemar taike chari jaise, aru tai sapha hoi jaise. ⁴³ Kintu Jisu pora taike samjai dikena jabo dise. ⁴⁴ Aru taike koise, "Sabi tumi kunke bhi eku nokobi, kintu jabi, tumi nijor purohit khan ke dikhai dibi, aru tumi sapha huwa laga dikhai kene Moses laga niyom kori taikhan ke sakhi hobole dibi‡." ⁴⁵ Kintu bemar bhal hoija manu pora etu kotha bisi manu ke koi dise, aru Jisu khula-khula nogor te jabole napara hoise. Kintu Tai bahar alag jagah te thakise, aru manu khan ephale-uphale pora Tai logote ahise.

2

Jisu He Jothor-rugi Thaka Ekjon Ke Bhal Kora

¹ Aru Jisu Capernaum nogor te olop din pichete wapas ahise, aru Tai Simon Peter laga ghor te ase koi kene manu khan huni loise. ² Manu bisi ta te joma hoise aru jaga nathaka hoi jaise, dorjate bhi jaga nathaka hoise, aru Jisu pora taikhan ke Isor laga kotha koise. ³ Titia kunba manu khan Jisu usorte ekjon juthor bemar para bera bole napara manu ke loi anise; taike charjon pora uthai anise. ⁴ Jitia taikhan manu bisi thaka nimate Jisu usorte taike loi jabole para nai, taikhan kun

‡ 1:44 1.44 Lev. 14:2-32.

jagate Jisu thakise, ta te laga chat hatai dise, aru chaat khuli diya pichete, taikhan bisna te ghumai thaka manu ke Jisu usorte namai dise. ⁵ Jitia Jisu taikhan laga biswas dikhise, Tai etu manu ke koise, “Putro, tumi laga paapkhan sob maph kori dise.” ⁶ Etiya niyom likha khan kunba ta te bohi thakise, aru taikhan nijor laga monte bhabona korise, ⁷ “Kile etu manu eneka kotha koi ase? Tai misa koi ase! Kun he paap to maph kori bole paribo, khali Isor nohoile?*” ⁸ Titia Jisu atma pora jani jaise taikhan nijor monte ki bhabona kori ase. Jisu taikhan ke hudise, “Tumikhan kele monte eneka bhabona kori ase? ⁹ Etu bera bole napara manu ke ki koile bhal ase, ‘Tumi laga paap to maph hoise’ na etu kobole ‘Uthibi, tumi laga bisna uthabi, aru berabi?’ ¹⁰ Kintu tumikhan etu jani lobi Manu laga Putro ke etu prithibi te paap pora maph dibole nimate adhikar dise,” aru Jisu bera bole napara manu ke koise, ¹¹ “Moi tumike koi ase, uthibi, tumi laga chatai lobi, aru nijor laga ghor te jabi.” ¹² Titia tai joldi uthi kene chatai uthaise, aru sob manu laga usor pora bahar te ulai jaise. Etu dikhi kene, taikhan sob asurit hoi jaise aru taikhan Isor ke dhanyavad dise, aru koise, “Moi khan kitia bhi eneka dikha nai.”

Jisu Pora Levi Ke Mata

¹³ Etu pichete Tai aru nodi kinar te jaise, aru bisi manu Tai usorte ahise, aru Jisu taikhan ke sikhaise. ¹⁴ Jitia Jisu jai thakise, Tai Aalpheus laga chokra Levi ke poisa utha manu khan laga

* **2:7** 2.7 Isa. 43:25

tambu te bohi thaka dikhise titia Jisu taike koise, “Moi laga pichete ahibi.” Tai uthi kene Jisu laga pichete jaise.

¹⁵ Aru eneka hoise Jisu Levi laga ghor te khana khai thakise, aru bisi poisa utha manu aru paapi manu khan bhi Jisu aru Tai laga chela khan logote bohi kene eke logote khai thakise, kelemane bisi manu thakise aru taikhan Jisu laga pichete jai thakise. ¹⁶ Jitia kunba niyom likha khan kunkhan Pharisee khan he asele, Jisu ke dusra paapi aru poisa utha manu khan logote bohi kene khai thaka dikhise, taikhan Jisu laga chela khan ke koise, “Kile Tai poisa utha aru paapi manu khan logote bohi kene khai ase?” ¹⁷ Jitia Jisu etu hunise, Tai koise, “Gaw bhal thaka manu khan ke dawai nalage, kintu kun manu bema ase, taikhan he lage. Moi dharmik manu ke mati bole aha nai, kintu paapi manu khan nimite ahise.”

¹⁸ Etiya John laga chela khan aru Pharisee khan upwas loi thakise, titia taikhan ahi kene Jisu ke koise, “Kile John laga chela aru Pharisee khan laga chela khan upwas loi ase, kintu Apuni laga chela khan upwas noloi?” ¹⁹ Titia Jisu taikhan ke koise, “Shadi te aha manu khan to shadi kori thaka mota taikhan logote thaka tak upwas lobole napare, napare? Jitia tak taikhan logote shadi kora mota ase, taikhan upwas lobole na paribo. ²⁰ Kintu eneka din ahibo jitia shadi kora mota ke taikhan pora loijabo, titia taikhan upwas lobo. ²¹ Kun bhi notun kapra te biya kapra hali kene nasilai. Eneka korile kapra biya hoi jabo, notun kapra ke purana kapra pora

biya kori dibo, aru etu pora pura kapra biya hoi jabo. ²² Aru kun bhi notun angur ros to loi kene purana chamra jola te narakhe. Eneka korile angur ros aru purana chamra jola duita bhi biya hoi kene phati jabo. Kintu notun angur ros ke notun chamra jola te he hali kene rakhibo.”

Jisu He Bisram Din Laga Probhu Ase

²³ Aru eneka hoise, Tai Bisram dinte dhaan kheti paar hoi kene jai asele, Tai chela khan juwa somoite dhaan bhangai kene khai thakise†. ²⁴ Aru Pharisee khan taike koise, “Sabi, kele juntu kaam Bisram dinte koribo nalage etu kori ase?” ²⁵ Kintu Jisu taikhan ke jowab dise, “Jitia David bhuk lagise- tai aru tai sathi khan ki korise,- etu tumikhan porha nai naki, ²⁶ jineka tai Isor laga ghor te jaise jitia Abiathar mukhyo purohit thakise, aru ta te daan diya roti khaise, juntu niyom hisab te tai khabole napare, khali purohit khan he nohoile, kintu tai bhi khaise aru tai laga sathi khan ke bhi dise?‡” ²⁷ Aru Tai taikhan ke koise, “Bisram din to manu karone bonai dise, kintu Bisram din karone manu ke bona nohoi. ²⁸ Karone Manu laga Putro to Bisram din laga Probhu ase.”

3

Hath Sukhai Kena Thaka Ekjon Manu

¹ Dusra dinte, Jisu aru mondoli te wapas jaise, aru ta te hath biya thaka ekjon thakise. ² Kunba khan Taike golti lagabo karone Bisram dinte Tai bemar manu khan ke bhal kori dibo na nai sai

† 2:23 2.23 Due. 23:25 ‡ 2:26 2.26 I Sam. 21:1-6

thakise. ³ Aru Tai hath biya thaka ke koise, “Uthi kene age ahibi.” ⁴ Titia Tai taikhan ke hudise, “Bisram dinte bhal kaam koribo lage na biya kaam koribo lage, jibon bachabo namorabo?” Kintu taikhan chup-chap thakise. ⁵ Aru taikhan laga mon tan huwa dikhikene Jisu bisi khong hoise, aru Tai hath biya thaka manu ke koise, “Tumi laga hath uthabi.” Aru etu manu tai hath uthaise, aru hath bhal hoi jaise. ⁶ Titia Pharisee khan ulaikene joldi Herod laga manu khan logote mili kene Tai bhirodh te, Taike morai dibo karone taikhan bisara shuru korise.

Dangor Bhir Jisu Piche Juwa

⁷ Kintu Jisu Tai chela khan ke loi kene nodi phale jaise, aru Galilee nodi aru Judea desh ⁸ aru Jerusalem sheher, Idumea, aru Jordan paar pora aru Tyre aru Sidon sheher khan phale pora bisi manu Tai logot ahise. Tai dangor asurit kaam kori diya huni kene Tai logote dangor bhir Tai logot ahi jaise. ⁹ Aru Tai chela khan ke Tai karone ekta chutu naw bisari bole koise, kelemane bhir pora Taike chipai dibo hoiya karone. ¹⁰ Kelemane Tai bisi manu ke bhal kora karone jiman bemark ase, sob Taike chubole kosis korise. ¹¹ Aru letera thaka atma khan Taike dikhise, aru Tai laga age te giri kene hala kori Taike koise, “Apuni Isor laga Putro ase.” ¹² Kintu Tai taikhan ke jor pora koise, Tai kun ase manu khan ke janibo nadibi koi kene.

Apostle Baroh jon

¹³ Aru Tai pahar uporte jaise, aru jun manu ke Tai lage, eitu khan ke Tai usorte matise, aru

taikhan Tai logote ahise. ¹⁴ Titia Tai logote thaki bole baroh jonke basi loise, - taikhan ke prochar kori bole pathai dibo karone- ¹⁵ Aru bemar khan ke bhal kori dibole aru bhoot khan ke khedai dibole hokti aru adhikar dise. ¹⁶ Aru Tai baroh jonke basi loise: Simon jun laga naam Tai Peter rakhise. ¹⁷ Zebedee laga Putro James aru tai laga bhai John jun khan laga naam Tai Boanergas rakhidise, etu laga motlob ase, bhijili laga chokra khan. ¹⁸ Andrew, Philip, Bartholomew Matthew, Thomas, aru Alphaeus laga Putro James, Thad-daeus, Simon Zealot. ¹⁹ Aru Iscariot Judas, jun Taike thogai dise.

²⁰ Ek din Jisu ekta ghor bhitor te bohise, aru bisi manu ahi joma hoi jaise, etu karone Jisu aru chela khan to bhaat bhi khabole para nai. ²¹ Kintu jitia Tai nijor ghor manu khan etu kotha hunise, taikhan Taike dhori loi jabole bhabise, kelemane taikhan koise, "Tai laga dimag biya hoi jaise."

Pobitro Atma Ke Ninda Kora

²² Aru Jerusalem pora aha niyom likha khan koise, "Tai logote Beelzebul* ase" aru "Tai bhoot khan laga adhikar pora bhoot ke khedai ulai ase." ²³ Karone Tai taikhan ke usorte mati ani kene dristanto pora koise, "Kineka kori Saitan he Saitan ke khedai dibo paribo? ²⁴ Jodi ekta rajyo to nijor bhitor te namili kene bhag hoile, etu rajyo khara koribo na paribo. ²⁵ Jodi ekta ghor nijor majot namila hoile, etu ghor bhi khara koribo na paribo. ²⁶ Aru jodi Saitan bhi nijor

* **3:22** 3.22 Saitan

majot te namila hoi kene alag hoile, tai thakibo na paribo, kintu tai khotom hobo. ²⁷ Kun bhi takot manu laga ghor te ghusi kene saman chor koribo na paribo, jitia tak takot manu ke bandhi nolobo, etu pichete he tai saman chor koribo paribo. ²⁸ Moi tumikhan ke hosa kobo, prithibi te thaka sob laga paap ke maph kori dibo, Isor ke hinsa kora kotha bhi maph kori dibo. ²⁹ Kintu jun bhi Pobitro Atma uporte biya kotha ekta bhi kobo, taike maph nadibo, kintu kitia bhi khotom nohua golti kori dibo.”- ³⁰ Kelemanee taikhan koi thakise, “Tai logote dusto atma ase.”

Jisu Laga Ama Aru Bhai Khan

³¹ Titia Jisu laga ama aru bhai khan ahi kene bahar te rukhise, aru Taike mati bole manu pathaise. ³² Dangor bhir tai logote thakise, hoilebi taikhan koise, “Sabi! Apuni laga ama aru bhai khan bahar te ahi kene Apuni ke bisari ase.” ³³ Kintu Tai jowab di koise, “Kun Ami laga ama aru bhai ase?” ³⁴ Titia Tai ghuri kene bohi thaka khan ke saikene koise, “Sabi, eitu khan he Ami laga bhai aru ama khan ase. ³⁵ Kelemanee jun Isor itcha koribo, eitu khan he Ami laga bhai, bhoini aru ama ase.”

4

Bijon Hala Laga Dristanto

¹ Aru Tai Galilee Nodi kinar te sikhable shuru korise, aru bisi Tai usorte dangor bhir joma hoi jaise. Titia Tai ekta naw pora samundar te bohi jaise, aru bisi thaka khan samundar kinar sukha jagate khara thakise. ² Titia Tai taikhan

ke dristanto pora bisi kotha sikhai dise, aru Tai updesh te taikhan ke eneka koise. ³ “Huni bhi! Bijon diya manu ekjon bijon hissi bole jaise. ⁴ Aru eneka hoise, Tai bijon hissi dise, aru kunba bijon rasta kinar te giri jaise, aru chiriya khan ahikena khai dise. ⁵ Kunba olop mati thaka pathor te giri jaise, ta te mati bisi nathaka karone joldi uthijaise. ⁶ Kintu jitia suryo uporte uthise aru gham dise, taikhan jor nathaka karone phat sukhi jaise. ⁷ Aru kunba bijon to kata thaka jagate giri jaise, aru kata uthi kene bijon ke dabai loise, etu karone guti dhoribo para nai. ⁸ Kintu baki bijon bhal matite girise, aru taikhan uthijaise, aru bhal hoi kene guti dhurise, aru kunba tis guna, kunba saat aru kunba sou guna dise. ⁹ Aru Tai taikhan ke koise, jun laga huni bole kaan ase, taike hunibo dibi!”

Dristanto Laga Motlob

¹⁰ Kintu jitia Tai ekla hoi jaise, titia Tai laga chela aru Tai logote thaka khan Taike etu dristanto laga motlob hudise. ¹¹ Aru Tai taikhan ke koise, “Tumikhan ke to Isor rajyo laga lukaikene thaka kotha janibole dise. Kintu bahar manu khan ke to dristanto pora koi ase,

¹² Kelemanee taikhan sai thakibo, kintu nadikhibo,

Aru taikhan huni thakibo kintu nabujhi bo,
Etu nimite taikhan ghuri ahikena taikhan laga paap pora khyama napai.*”

* **4:12** 4.12 Isa. 6:9-10; Jer. 5:21.

¹³ Aru Jisu pora taikhan ke hudise, “Kile tumikhan etu dristanto na bujhe? Tinehoile tumikhan sob dristanto kineka bujhi bo paribo?
¹⁴ Kheti kora manu he Isor laga kotha hissi diya jon ase. ¹⁵ Rasta kinar te kotha hissi dise, aru jitia taikhan kotha hunise, Saitan joldi ahikena taikhan monte thaka kotha loijai. ¹⁶ Tineka he pathor jagate hissi diya khan ke bhi hoise, taikhan kotha huni kene khushi pora joldi mani loise. ¹⁷ Kintu jor nathaka karone olop din he thakibo parise. Etu pichete jitia kotha karone dukh kosto ahise, titia joldi taikhan giri jaise. ¹⁸ Aru kata te hissi diya to jun manu kotha ke huni loise, ¹⁹ kintu duniya laga chinta, aru dhun laga thoga baji, aru kisim-kisim jinis laga lalos pora taikhan monte jai kene, kotha ke dabai dise aru phol ulabo napara hoijai. ²⁰ Kintu bhal matite hali diya khan ase, jun khan kotha huni kene mani loise, aru phol dibo parise, kunba tis guna kunba sat guna aru kunba sou guna.”

Tukri Nichete Saaki

²¹ Jisu taikhan ke arubi eneka koidi thakise, “Kunbi saaki julai kene ekta tukri nohoile bisna nichete narakhe nohoi? Etu ke jolai kene khamba uporte rakhe nohoi? ²² Kelemaneyate lukai rakhibole eku bhi nai, jitia tak dikhai nadiye, aru lukaikene ki kaam korise eitu khan sob puhor te dikhi jabo. ²³ Jodi kunba huni bole kaan ase, taike hunibo dibi!” ²⁴ Titia Tai koise, “Tumikhan bhal pora huni bhi, ji naap tumi naapi dise, etu pora tumike bhi naapibo, aru etu pora bhi bisi di dibo. ²⁵ Kelemaneyate jun

logote kiba ase, taike aru di dibo, kintu jun logote eku bhi nai, tai pora olop thaka ke bhi loijabo.”

Bijon Uthi Juwa Laga Dristanto

²⁶ Aru Tai koise, “Isor laga rajyo to kunba matite bijon hali diya nisena ase. ²⁷ Aru tai ghumai kene rati aru dinte uthi thake, aru bijon dangor hoi thake, kintu tai najane kineka pora dangor hoi. ²⁸ Mati nijor pora ghas ulai aru dhaan diye: poila to phul diye aru hawa khai, etu pichete dangor hoi kene dhaan diye. ²⁹ Kintu jitia dhaan pakki jai, titia tai joldi dhaan kata manu khan ke pathai, kelemane katibo somoi huwa karone.”

Sorso Bijon Laga Dristanto

³⁰ Titia Tai koise, “Kineka pora amikhan Isor laga rajyo ke tulona koribo? Nohoile ki dristanto pora etu dikhai dibo? ³¹ Etu to sorso dana nisena ase, jitia etu matite hissi dise, etu somoi matite sob pora chutu guti ase. ³² Kintu, jitia etu ke hissi diye, aru uthi jai, kheti te thaka pata sob pora bhi dangor hoijai, aru tai daal dangor hoi kene, akas laga chiriya bhi etu laga chaya te ghor bonai thake.†”

³³ Aru Tai dristanto pora eneka bisi kotha taikhan ke bujhi bole koi dise. ³⁴ Kintu dristanto nohoi kene taikhan ke eku bhi kowa nai. Aru jitia Tai ekla hoise, Tai chela khan ke eitu khan laga motlob samjhai dise.

Jisu Pora Tufan Rukhai Diya

† **4:32** 4.32 Palestine te sorso bijon to dangor ghas hoi thakisele.

³⁵ Etu din jitia saam hoise, Jisu pora chela khan ke koise, "Ahibi, amikhan etu jagate jabo."
³⁶ Aru taikhan bhir ke chari kene, Tai logot naw te uthise. Aru dusra nawkhan bhi thakise.
³⁷ Titia dangor hawa ahise, aru tufan pora naw ke mari thaka karone naw to pani bhorta hoi jaise. ³⁸ Kintu Jisu to kinar te palis uporte ghumai thakise. Aru taikhan Taike uthaikene koise, "Shika manu, amikhan khotom hobole ase aru Apuni chinta nai?" ³⁹ Titia Jisu uti kene andhi ke galise aru nodi ke koise, "Chup thakijabi!" Aru hawa rukhi jaise aru sob shanti hoi jaise. ⁴⁰ Kintu Tai Taikhan ke hudise, "Kile tumikhan bhoi korise? Tumikhan etiya bhi biswas nakore?" ⁴¹ Aru taikhan bisi bhoi hoi kene ekjon majote kotha korise, "Etu kun ase? Hawa aru nodi bhi Tai laga kotha mane!"

5

Dusto Atma Pora Dhuri Thaka Manu

¹ Aru Jisu aru chela khan Galilee Nodi laga dusra phale, Gerasenes jagate ahise. ² Aru jitia Jisu naw pora ulai ahise, ekjon junke dusto atma pora dhorise, joldi kobor pora ulai ahi kene Taike lok paise. ³ Tai kobor te he thake, aru kunbi taike rukhahole manu thaka nai, luha rusi pora bhi bandhi rakhibole napara hoise. ⁴ Kelemanee taike bar-bar theng te luha rusi pora bandhi rakhise, kintu tai bhangai di thake. Aru ta te kun bhi taike dhori kene rakhibo paribole takot thaka nai. ⁵ Tai rati din hoile bhi hodai pahar te aru kobor te he thake, aru kandi kene tai dhar pathor pora nijorke jokhom kori thake. ⁶ Jitia tai dur pora

Jisu ke dikhise, tai Jisu phale polaikene jaise aru salam korise. ⁷ Aru tai jor pora kandi kene koise, “Jisu, Porom Prodhan Isor laga Putro? Apuni ami logote ki kaam ase? Ami Isor naam pora Apuni ke anurodh kori ase, amike dukh nadibi.*” ⁸ Kelemanе poila pora Jisu eneka koidisele, “O dusto atma, etu manu pora ulai jabi.” ⁹ Titia Tai taike hudise, “Tumi laga ki naam ase?” Aru tai koise, “Ami laga naam Legion ase, kelemanе amikhan bisi ase.” ¹⁰ Aru tai Jisu ke anurodh korise taikhan ke etu jaga pora bahar napothabo nimite. ¹¹ Aru ta te pahar te gahori khan kiba khai thakisele, ¹² aru biya atma khan Tai logote binti korise, “Amikhan ke gahori laga bhitor te ghusi jabo dibi.” ¹³ Karone Tai taikhan ke jable koi dise, titia dusto atma to ulaikene gahori te ghusi jaise, etu sob dui-hajar nisena gahori thakise, rang-khang pora polai ahi kene nodi te giri dubi jaise. ¹⁴ Titia jun manu gahori ke khilai thakisele, taikhan polai ahi kene sheher te aru bosti te thaka sobke koi dise, aru ki hoise koi kene manu khan sabole ulai ahise. ¹⁵ Titia taikhan Jisu logote ahise, aru jun logote Legion thakisele, bhal hoi kene kapra lagai thaka dikhi kene taikhan bhoi khaise. ¹⁶ Aru etu dusto atma thaka manu logot ki hoise aru gahori khan ke ki hoise etu laga kotha bhi sob manu ke koi dise. ¹⁷ Titia taikhan Jisu ke etu desh pora jai jable koise. ¹⁸ Aru jitia Jisu naw te uthijaise, jun manu logote biya atma thakisele, tai Jisu logote jable binti korise. ¹⁹ Hoile bhi Jisu taike Tai logote jabo

* 5:7 5.7 Mat. 8:29; I Kin. 17:18.

diya nai kintu koise, “Tumi nijor ghor te jabi, aru tumi laga sathi khan ke kineka tumi laga Probhu pora morom korise aru dangor kaam kori dise etu sob koi dibi.” ²⁰ Aru etu manu Decapolis† te jai kene ta te Jisu pora tai nimate ki kori dise etu sobke koise, aru jiman manu hunise, taikhan sob asurit hoise.

Jisu Pora Ekjon Mahila Aru Jairus Laga swali Ke Changai Kora

²¹ Aru jitia Jisu naw pora etu pahar hoi kene jaise, titia dangor bhir Tai logote joma hoi jaise, aru Tai nodi kinar te thakise. ²² Aru sabi, Jairus naam mondoli laga cholawta ekjon ahi Jisu laga theng te giri jaise. ²³ Aru Tai logote binti kori koise, “Ami laga chutu swali mori bole ase. Tai bhal hoi kene jinda thaki bole Apuni ahibi aru tai uporte Apuni laga hath dibi.” ²⁴ Titia Jisu tai logote jaise, aru bisi joma thaka khan Tai logote ahise, aru dhaka-dhaki kori kene jai thakise.

²⁵ Aru ekjon mahila baroh saal pora khun jai thaka ta te thakise. ²⁶ Aru bhal kora manu khan logote bisi dukh kori toka poisa sob kharcha kori saise, hoile bhi bhal nohoi, kintu aru bisi biya hoi thakise. ²⁷ Jitia tai Jisu ki korise etu laga kotha khan hunise, bhir thaka majot pora ahi kene Jisu laga kapra chuisse. ²⁸ Kelemanee tai bhabise, “Jodi moi Tai laga kapra khali chubo parise koile, moi bhal hoi jabo.” ²⁹ Titia tai khun jai thaka rukhi jaise, aru tai laga gaw pora janibo parise bemar bhal hoi jaise. ³⁰ Aru loge-loge te, Jisu bhi Tai pora hokti ulai ja jani loise. Aru Tai ghuri kene

† **5:20** 5.20 Decapolis motlob ase dosta sherer.

ephale-uphale manu khan ke saikene hudise, “Kun pora Ami laga kapra chuisse?” ³¹ Kintu Tai chela khan Taike koise, “Sabi manu bisi Apuni ke dhaka-dhaki kori jai ase etu dikhi kene bhi, Apuni koise, ‘Kun Moike chuisse?’” ³² Aru kun he Taike chuishe koi kene Tai ghuri kene saise. ³³ Aru etu mahila jani loise tai laga bemar bhal hoi jaise aru bisi bhoi hoi kene Jisu laga theng te giri kene Tai logote ki-ki hoise sob hosa koi dise. ³⁴ Aru Tai taike koise, “Chukri, tumi laga biswas he tumike bhal korise, shanti pora jabi, aru etu bemari pora bhal hoi jabi.”

³⁵ Jitia Tai etu kotha koise, kunba manu khan Yehudi cholawta laga ghor pora ahi kene koise, “Tumi laga swali mori jaise. Etiya sikha manu ke kele aru dukh dibo?” ³⁶ Kintu taikhan ki koi thakise, etu Jisu huni kene Tai mondoli laga cholawta ke koise, “Bhoi nokoribi. Biswas he rakhibi.” ³⁷ Aru Tai Peter aru James aru James laga bhai John eitu khan ke chari kunke bhi Tai logote jabo diya nai. ³⁸ Aru titia Tai mondoli laga cholawta laga ghor te ahise, ta te manu khan jor pora hala kori kandi thaka dikhise. ³⁹ Titia Tai bhitor te ahise, aru Tai taikhan ke koise, “Tumikhan kele dukh hoi kene kandi ase? Swali to mora nohoi, kintu tai khali ghumai ase.” ⁴⁰ Aru taikhan Taike hasi dise, kintu Tai taikhan ke bahar te ulai dikene swali laga baba aru ama aru jun manu Tai logote thakise, taikhan ke loi kene bhitor te swali thaka jagate jaise. ⁴¹ Titia Tai swali laga hath dhori kene koise, “Talitha Koum!” Etu motlob ase: Chutu swali, Moi tumike koi ase, uthibi.” ⁴² Aru loge-loge etu swali uthi

kene bera bole hoise,- kelemene tai laga umor baroh saal thakise.- Aru taikhan sob bisi asurit hoi jaise. ⁴³ Kintu Tai kun manu ke bhi janibo nadibi koi kene swali laga baba ama khan ke mana korise aru taike kiba khabole dibi koise.

6

Nazareth Te Jisu Ke Tyag Korise

¹ Titia Tai ta te pora ulaikene nijor town, Nazareth te ahise, aru Tai laga chela khan Tai logote ahise. ² Aru Bisram dinte Tai mondoli te sikhai thakise, aru bisi manu Tai kotha huni kene asurit hoise, aru ekjon majot te eneka hudi thakise, “Etu manu to kot pora etu kotha sob jani ase, aru Taike diya etu ki laga gyaan ase? Aru kineka hokti laga kaam etu manu laga hath pora asurit kaam hoi ase?” ³ “Tai barhoi nohoi, jun Mary laga chokra ase, aru James, Joses, Judas, aru Simon laga bhai to? Aru Tai laga bhoini khan yate amikhan logote thaka nohoi?” Karone taikhan Taike bhal puwa nai. ⁴ Kintu Jisu Taikhan ke koise, “Ekjon bhabobadi to tai laga adar nathaka nohoi, kintu tai laga nijor nogor aru nijor ghor manu khan majot tai adar napai.” ⁵ Aru Tai ta te dusra kaam koribo para nai, khali kunba bemar ke hath lagai kene bhal kori diya he hoise. ⁶ Aru taikhan biswas nakora karone Tai asurit hoise, aru Tai bosti te berai kene sikhai thakise.

Jisu Pora Apostle Khan ke Pathai Diya

⁷ Aru Tai baroh jon chela khan ke Tai usorte mati ani kene taikhan ke duijon kori pathai dise, aru taikhan ke dusto atma khan kheda bole

adhikar dise. ⁸ Aru Tai taikhan ke sikhai dise safar juwa somoite, eku bhi noloikena khali ekta lathi he lobi, aru jola, bhaat, aru poisa laga peti te poisa nolobo. ⁹ Kintu juta lagabo,- aru kapra bhi duita napindhobo. ¹⁰ Aru Jisu taikhan ke koise, “Jitia tumikhan kunba ghor te ghushi bo, tumikhan etu jaga chari kene najuwa tak etu ghor te he thakibi. ¹¹ Aru jodi etu jagate manu kun bhi tumikhan ke grohon nakore, aru kotha nahune, eneka hoile ta te pora juwa somoite tumikhan theng te thaka dhuli jhari dibi, taikhan bhirod de etu pora sakhi hobo karone.” ¹² Karone baroh jon chela khan jai kene manu khan ke mon ghura bole prochar kori dise. ¹³ Aru taikhan bisi bhoot khan ke khedai dise, aru bemari ke tel malis kori kene taikhan ke bhal kori dise.

Baptizma Diya John Mora

¹⁴ Aru Herod raja bhi eitu khan hunise, keleman sob pora Jisu laga naam jani jaise, aru kunba khan eneka koi thakise, “Baptizma diya John to mora pora jee uthijaise, aru etu karone tai pora he eneka dangor kaam kori ase.” ¹⁵ Dusra koise, “Tai Elijah ase.” Kintu dusra khan koise, “Tai poila te bhabobadi thaka khan nisena he ekta bhabobadi ase.” ¹⁶ Kintu jitia Herod etu kotha hunise, “John jun laga matha moi kati disele- tai mora pora jee uthijaise.” ¹⁷ Keleman, Herod to tai nijor bhai Philip laga maiki Herodia ke shadi korise, etu nimite tai manu pathai kene John ke bondhi ghor te rakhi disele. ¹⁸ Keleman John pora Herod ke koise, “Tumi nijor bhai laga maiki ke luwa to Isor laga

nyom te thik nohoi.*” 19 Karone Herodias bhi John ke biya paikena taike morai dibo bhabisele, kintu tai para nai. 20 Kelemanne Herod to John ke bhoi kori thakise; tai jani thakise John to ekjon dhormik aru pobitro manu ase, aru taike bhal pora bachai kene rakhise. Tai kotha hunile bisi bhoi hoijai, kintu khushi pora huni thake. 21 Aru ekta bhal dinte, Herod pora tai laga jonon dinte, tai laga daruga khan, senapoti khan aru adhikari manu khan, aru Galilee laga cholawta khan ke rati te khana te matise. 22 Aru Herodias laga chukri nachi kene Herod aru ta te thaka sobke khushi kori dise, titia Herod pora swali ke koise, “Mangibi moi pora ki lage, moi tumike dibo.” 23 Aru tai swali usorte kosom khaise, “Tumi ki mangibo, moi laga adha rajyo mangile bhi, moi tumike dibo.” 24 Karone swali jai kene tai laga ama ke hudise, “Moi ki mangibo?” Titia tai ama jowab dise, “Baptizma diya John laga matha mangibi”. 25 Tai joldi raja logote ahi koise, “Baptizma diya John laga matha ekta thali pora moike di dibi, etu he ami laga itcha ase.” 26 Titia raja laga mon bisi dukh hoise, kintu tai kosom diya karone aru Tai logote boha alohi manu khan karone tai swali ke nohobo kobo napara hoise. 27 Aru raja joldi ekjon sipahi ke John laga matha kati kene anibole hukum dise. Aru bondhi ghor te jai kene tai laga matha kati loise. 28 Aru ekta thali te rakhise aru etu swali ke dise, aru swali pora tai ama logot dise. 29 Jitia John laga chela khan etu hunise, taikhan ahi kene tai laga gaw uthai loijai kene ekta kobor te rakhidise.

* 6:18 6.18 Lev. 18:16; 20:21

Jisu Pora Pans Hajar Manu khan ke Khabole Diya

³⁰ Titia apostle khan Jisu logote ahi joma hoise, aru ki kaam taikhan korise, aru sikhai dise, sob Taike koi dise. ³¹ Aru Tai taikhan ke koise, “Tumikhan nijor alag sunsan jagah te jai kene olop somoi aram kori lobi.” Keleman ta te bisi manu aha-juwa kori ase, karone taikhan khabole somoi bhi napa hoi jaise. ³² Aru taikhan naw pora ekta alag sunsan jagah te jai jaise. ³³ Kintu bisi manu taikhan jai thaka dikhi kene sob nogor pora polai ahise aru Tai logote ahise. ³⁴ Aru Jisu jitia bahar te ulaise, dangor bhir dikhikena taikhan ke morom lagise, keleman taikhan to roikhya nathaka nisena thakise. Aru Tai bisi kotha taikhan ke sikhai dise. ³⁵ Jitia saam hoi jaise, Jisu laga chela khan ahi kene Jisu ke koise, “Etu sunsan jagah ase, aru homoi to deri hoi jaise. ³⁶ Taikhan ke pathai dibi, taikhan ephale-uphale usor bosti te jai kene nijor karone roti kinibo dibi, keleman taikhan khabole eku nathaka hoise.” ³⁷ Kintu Tai taikhan ke jowab di koise, “Tumikhan he taikhan ke kiba khabole dibi.” Aru taikhan Jisu ke hudise, “Amikhan jai kene dui-sou dinarii† laga roti kini ani kene taikhan ke khabole dibo?” ³⁸ Kintu Tai taikhan ke koise, “Tumikhan logote kiman roti ase? Jai kene sabi.” Aru jitia taikhan saikene koise, “Pansta roti aru duita maas.” ³⁹ Titia Tai sob manu ke ghas te joma hoi kene bohi bole koise. ⁴⁰ Titia taikhan ke eksoh-eksoh aru pachas-pachas kori

† 6:37 6.37 Ek denarius to ek din laga hajara kora laga poisa thakisele.

kene alag-alag jagate bohi bole koi dise. ⁴¹ Aru Tai pansta roti aru duita maas ke loi kene sorgo phale saise aru dhanyavad dikena roti bhangai se aru manu khan ke dibole chela khan ke koise. Aru Tai duita maas ke bhi taikhan sob logote bhag kori dise. ⁴² Titia Taikhan sob khai loise aru pet bhorta hoise. ⁴³ Aru baroh ta tukri te bachi juwa roti tukra aru maas joma korise. ⁴⁴ Ta te taikhan roti kha pans hajar manu thakise‡.

Jisu Samundar Paani Uporte Bera

⁴⁵ Titia Tai manu khan ke pathai dibo karone chela khan ke naw pora joldi Nodi laga dusra phale, Bethsaida te jabi koi dise. ⁴⁶ Aru Tai prathana kori bole pahar te jai jaise. ⁴⁷ Jitia saam ahise naw to nodi majote thakise, aru Tai ekla he matite asele. ⁴⁸ Titia hawa taikhan ke ulta pora mari thaka karone, naw ke age te loi jabole bisi digdar huwa Tai dikhise. Aru choutha paher§ nisena Tai nodi te khujkari taikhan logote ahise, aru taikhan pora age ulai jabole bhabise. ⁴⁹ Kintu jitia Tai nodi te Tai khujkari aha dikhise, taikhan bhoot dikhise bhabi kene bisi hala korise. ⁵⁰ Kelemanee taikhan sob Taike dikhi kene bisi bhoi hoise, kintu Tai joldi taikhan logote kotha korise aru koise, “Mon dangor koribi, Moi he ase! Bhoi na koribi!” ⁵¹ Titia Tai taikhan logote naw te ahise, aru hawa rukhi jaise, aru taikhan bisi asurit hoise. ⁵² Kelemanee taikhan etu roti laga motlob bhi buja nai. Kintu, taikhan laga mon tan hoi thakise.

‡ **6:44** 6.44 Mahila aru bacha khan bhi khaishe, hoilebi taikhan ke ginti korate hala nai. § **6:48** 6.48 Phojur tin aru choi bajji bhitor te

Gennesaret Jagate Jisu He Bemar Manu Ke Changai Kora

⁵³ Jitia taikhan paar kori kene matite ahise taikhan Gennesaret jagate ahi kene naw ta te lagai rakhise. ⁵⁴ Aru jitia taikhan naw pora ulai ahise, manu khan Taike joldi jani loise. ⁵⁵ Aru usorte thaka bosti khan sob polai ahise aru bemari khan ke bisna pora loi anise, aru jun jagah te Tai ase koi kene janibo, ta te loi ani thakise. ⁵⁶ Aru jun jagah hobi, bosti, nogor aru desh hobi, Tai kote jai, utu sob jagah te bemari khan ke bajar te bhi rakhi kene Tai laga kapra olop chubole binti kori thakise, aru jiman manu Taike chubo parise, taikhan sob bhal hoijai thake.

7

Niom Aru Hukum Khan

¹ Ek din, Jerusalem pora aha Pharisee aru kunba likha manu khan Tai logote joma hoise. ² Aru taikhan Jisu laga chela khan kunba ke hath nadhulai kene* bhaat khai thaka dikhise. ³ -Kelemanee Pharisee aru Yehudi khan purana niyom ke mani thakisele, taikhan hath nadhui kene eku bhi nakhai. ⁴ Jitia taikhan bajar jaga pora ahe, hath nadhui kene eku bhi nakhai, aru tineka bisi kotha ase: jun to taikhan mani thake, gilasa, thali, tamba laga borton, dhua aru sapha kora.- ⁵ Titia Pharisee aru niyom likha manu khan Jisu ke hudise, "Kile Apuni laga chela khan poila laga niyom namani kene choli thake,

* **7:2** 7.2 Yehudi niyom hisab te hath nadhula koi ase.

aru hath nadholai kene roti khai thake?” ⁶ Jisu taikhan ke jowab dise, “Isaiah he tumi kopoti khan laga kotha bhabobani thik koise. Tai eneka likhise,

‘Eitu khan mukh pora to Moike sonman kore, Kintu taikhan mon to Moi pora dur thake.

⁷ Aru taikhan misa-misi te Moike aradhana kori thake,

Kelemanee manu para bona niyom loi sikhai thake.†’

⁸ Kelemanee tumikhan Isor diya niyom chari kene manu bona niyom he mani thake.” ⁹ Tai taikhan ke koise, “Tumikhan manu he bona niyom mani kene, Isor diya bhal niyom khan chari dise.

¹⁰ Kelemanee Moses koisele, ‘Tumi laga baba aru ama ke Sonman koribi,’ aru, ‘Jun tai nijor baba, ama ke biya kobo, tai ji hoile bhi moribo.‡’

¹¹ Kintu tumikhan koi, ‘Jodi ekjon tai nijor baba, ama ke koi, “Moi pora tumi ki modot pabole ase, etu sob Isor pora Corban dise’ ” - motlob, ‘Isor ke di dise’. ¹² Aru tumikhan etu manu ke tai baba aru ama ke eku bhi modot kori bole nadiye.

¹³ Aru tumikhan Isor laga kotha biya kori thake tumikhan niyom pora. Aru bisi mili thaka nisena kaam kori thake.

Ki Pora Ekjon Ke Letera Kore

¹⁴ Aru titia Jisu pora manu khan ke Tai usorte mati anikena koise, “Ami laga kotha huni bhi, aru bujhi lobi. ¹⁵ Eneka jinis to nai, bahar pora manu bhithor te jai kene letera kori diya, kintu ji jinis bhitor pora ulai etu he taike letera kori diye.

† **7:7** 7.7 Isa. 29:13. ‡ **7:10** 7.10 Exo. 20:12; Due. 5:16.

¹⁶ Jodi kunba huni bole kan ase, taikhe hunibo dibi. ¹⁷ Jitia Tai bhir majot pora ulaikene ghor bhitor te ahise, taikhan Taike etu dristanto laga motlob hudise. ¹⁸ Aru Tai taikhan ke koise, “Kile tumikhan bhi eneka nabuja ase? Bahar pora manu laga bhitor te ki jai etu pora manu ke letera nakore. ¹⁹ Kelemanee etu tai mon para nohoi, kintu mukh pora pet te jai kene aru latrine te ulai jai, kele koile sob kha luwa to sapha ase.” ²⁰ Aru Jisu eneka koi thakise, “Ki mon pora ulai, etu he manu ke letera kore. ²¹ Kelemanee manu laga mon pora biya bhabona, bebichari, chor kora aru morai diya, ²² lalos, biya kaam kora, thogai diya, biya niyom thaka, suku jola, hinsa kora, dimag napuncha kaam kora, aru phutani kora. ²³ Etu sob biya bostu mon pora ahi manu ke letera kori diye.”

Syrophoenicia Mahila Laga Biswas

²⁴ Ta te pora Tai uthi kene Tyre aru Sidon laga desh phale jaise. Aru ekta ghor te jaise, aru kunke bhi janibo nadibo bhabisele, kintu Tai Iukabole para nai. ²⁵ Kintu ta te ekjon mahila jun laga chutu swali ke dusto atma pora dhurikena thakise, etu mahila Jisu laga kotha hunise, aru ahi Tai laga theng te giri jaise. ²⁶ Aru etu mahila Yunani aru Syrophoenicia jaga laga asele, aru tai swali pora bhoot ulai dibi koi kene Jisu ke binti korise. ²⁷ Kintu Jisu taikhe koise, “Poila, bacha ke khabole dibi. Kelemanee bacha laga roti loi kene kutta khan ke diya thik nohoi.” ²⁸ Aru tai jowab dikene koise “Hoi, Probhu, kintu kutta bhi bacha khan laga roti tukra mez nichete giri thaka

khahole pai.” ²⁹ Titia Tai taike koise, “Etu kotha karone tumi, jabi, bhoot tumi laga swali pora ulai jaise.” ³⁰ Aru tai jitia ghor te ahise, tai swali bisna te ghumai thaka aru bhoot ulai jai kene thaka pai loise.

Kan Benga Ekjon Jisu Pora Changai Kora

³¹ Titia Tai aru bhi Sidon laga desh pora ulai Decapolis laga desh te hoi Galilee nodi phale ahi jaise. ³² Titia kunba ekjon kaan benga aru kotha bhal pora kobo napara jon thakise, Tai laga hath tai uporte rakhi dibi koi kene binti korise. ³³ Aru Tai taike bisi thaka manu pora alag loijai kene tai laga kan te anguli ghusai dise, aru thuk dikene tai jiba te chui dise. ³⁴ Titia Tai sorgo phale saise aru jor pora awaj dikene koise, “Ephphatha!” - Motlob ase “Khuli jabi!” ³⁵ Titia joldi tai kan khuli jaise, aru tai jiba bandi thaka bhi khuli jaise, aru tai sapha pora kotha kori bole parise. ³⁶ Titia Tai taikhan ke etu kunke bhi nokobi koi mana kori dise kintu jiman taikhan ke mana kore, iman taikhan bisi kobole hoi jaise. ³⁷ Aru taikhan bisi asurit hoi ekjon majot te koi thakise, “Tai jiman bhi korise sob thik korise. Tai kan nahuna ke bhi huni bole dise, aru kobo napara ke bhi kotha kobole takot dise.”

8

Jisu Pora Char Hajar Ke Khabole Diya

¹ Dusra dinte arubi bisi manu joma hoi jaise, aru taikhan logote khabole eku thaka nai. Jisu pora Tai laga chela khan ke matise aru koise,
² “Moi etu sob manu khan ke bisi morom lage,

kelemane taikhan tin din pora Ami logote thaki ase, aru etiya taikhan logote khabole eku nai. ³ Jodi Moi taikhan ke ghor te bhukha pathai dile, taikhan rasta te komjur pora giri jabo pare, kelemane kunba to dur pora ahise.” ⁴ Titia chela khan Taike jowab dise, “Kote pora kunba yate jongol pora roti ani kene eitu khan ke khila bo paribo?” ⁵ Tai taikhan ke hudise, “Tumikhan logote kiman ta roti ase?” Taikhan koise, “Sat-ta.” ⁶ Titia Tai taikhan ke matite bohi bole adesh dise, aru Tai sat-ta roti loi Isor ke dhanyavad dise, aru bhangai kene chela khan ke di dise, aru taikhan pora sobke dise. ⁷ Taikhan logote ekta huru maas thakise, Tai etu bhi loi dhanyavad dikene taikhan ke dibole koise. ⁸ Titia taikhan khai kene aram pai loise, aru bachi juwa khana to sat-ta tukri bhorta uthai loise. ⁹ Aru jun khaise, taikhan char hajar nisena asele, aru Tai taikhan ke jabo dise. ¹⁰ Aru Tai joldi nijor chela khan ke naw te uthi kene Dalmanutha laga desh phale jaise.

Pharisee Khan Pora Ekta Chihna Mangise

¹¹ Titia kunba Pharisee khan ahi Taike hudise aru porikha korise. Taike sorgo pora ekta chihna taikhan ke dikha bole koise. ¹² Kintu Tai nijor Atma te dukh paa nisena lamba sans loi koise, “Kile etu yug khan chihna bisari thake? Moi tumikhan ke hosa kobo, etu yug khan ke eku chihna nadibo.” ¹³ Aru Tai taikhan ke chari kene, naw te uthijaise, aru nodi paar kori kene dusra phale jai jaise.

Pharisee Khan Aru Herod Laga Khomir

14 Aru chela khan roti lobole pahorise, aru naw te taikhan logote ekta roti pora bisi thaka nai. 15 Titia Jisu taikhan ke koise, "Sai rukhi thaki bhi, Herod aru Pharisee laga khomir pora hoshiar thakibi." 16 Taikhan apaste kotha korise, kelemane amikhan logote roti nathaka hoise. 17 Kintu Jisu etu jani kene taikhan ke hudise, "Tumikhan roti nathaka karone kele kotha kori ase? Kile etiya bhi najane? Tumi laga mon tan hoi thaki ase? 18 Suku thakile bhi, kele nadikhe? Kan thakile bhi, kele nahune? Aru tumikhan yaad nai? 19 Jitia Moi pans hajar karone pansta roti bhangai dise, aru tumikhan kiman tukri uthaise?" Taikhan jowab dise, "Baroh-ta tukri uthaise." 20 "Aru jitia Moi char hajar karone sat-ta roti bhangai sele, titia tumikhan kiman ta tukri bhorta kori uthaise?" Taikhan koise, "Sat-ta tukhri uthaise." 21 Titia Tai hudise, "Kile, tumikhan etiya bhi nabuje?"

Suku Andha Ekjon Bethsaida Te Jisu Bhal Kora

22 Titia Jisu aru chela khan Bethsaida te ahi jaise, aru taikhan suku nadikha manu ekjon Jisu logote loi anise, aru taike chubole binti korise. 23 Etu karone Tai suku nadikha manu laga hath dhorise aru bosti bahar te loi jaise, aru tai laga suku te thuki kene, Tai hath pora taike chuisse aru taike hudise, "Tumi kiba dikhi ase?" 24 Aru tai uporte sai koise, "Moi ghas nisena manu jai thaka dikhi ase." 25 Titia Tai arubi ekbar hath tai laga suku te chuisse, aru tai bhal pora sabo parise aru sapha pora sob dikhibo parise. 26 Titia Jisu taike ghor te pathai dise aru koise, "Town te etiya-etiya nimate najabi."

Peter Pora Jisu Khrista Ase Koikena Shikar Kora

²⁷ Titia Jisu aru Tai chela khan Caesarea Philippi laga usorte thaka bosti khan te jai jaise. Tai rasta te ja somoite, chela khan hudise, “Manu khan Moike kun ase koi?” ²⁸ Titia taikhan taike koise, “Baptizma diya John,’ aru kunba koi, ‘Elijah,’ aru kunba koi, ‘Ekjon bhabobadi.’ ” ²⁹ Tai taikhan ke koise, “Kintu tumikhan Moike ki koi ase?” Peter jowab di koise, “Apuni Khrista ase.” ³⁰ Titia Tai kun ase etu kunke bhi nokobi koise.

Tai Mora Aru Punoruthan Laga Age Te Jisu Kowa

³¹ Aru Jisu taikhan ke sikhbole shuru korise, Manu laga Putro bisi dukh koribo lagibo, bura khan aru prodhan purohit aru likha manu khan Taike namanibo aru morai dibo, aru Tai tin din pichete jee uthijabo. ³² Tai taikhan ke etu kotha sapha pora koi dise, aru Peter Taike alag loijai kene Taike hala korise. ³³ Kintu Jisu ghurikena chela khan ke saise aru Tai Peter ke galise aru koise, “Saitan! Ami laga usor pora dur hobi, kelemane tumi Isor laga kotha te nohoi, kintu manu laga bhabona te he thake.” ³⁴ Titia Tai bhir te thaka manu khan aru chela khan ke matise, aru Tai usorte ani kene koise, “Jodi kunba Ami laga piche koribo mon hoile, tai nijorke tyag koribo lage aru nijor Cross uthai loi Ami laga pichete ahibi. ³⁵ Kelemane jun nijor jibon bacha bole mon koribo, tai jibon harabo, kintu jun Moi karone, aru susamachar karone nijor jibon harabo, tai bachibo. ³⁶ Karone kunba manu sob

prithibi pai loi kene tai nijor jibon haraile, tai ki labh ase? ³⁷ Karone manu to nijor jibon laga bodli te ki dibo paribo? ³⁸ Judi biswas nathaka aru paapi yug pora Ami laga kotha ke aru Moi nimate sorom kore, Manu laga Putro bhi jitia Tai laga pobitro duth khan aru Baba laga mohima te ahibo, Tai bhi tai nimate kotha kobole sorom koribo.”

9

¹ Aru Jisu taikhan ke koi thakise, “Hosa pora Moi tumikhan ke kobo, yate khara thaka kunba khan namoribo jitia tak Isor rajyo laga takot loi kene aha ke nadikhe bo.”

Jisu Laga Chehera Aru Kapra Bodli Huwa

² Titia choi din pichete Jisu pora Peter, James aru John ke loi kene ekta untcha pahar te jaise. Titia taikhan usorte, Tai laga gaw bodli hoi jaise. ³ Tai kapra borop nisena bisi boga hoi jaise, etu prithibi te kun dhobi bhi tineka boga kori bole na pora nisena. ⁴ Titia Moses aru Elijah aha dikhai dise, aru taikhan Jisu logote kotha kori thakise. ⁵ Titia Peter pora Jisu ke koise, “Rabbi*,” amikhan yate thakile bhal hobo, amikhan ke tinta thaki bole jaga bonabo dibi, ekta Apuni nimate, ekta Moses nimate, aru ekta Elijah nimate.” ⁶ Aru tinjon chela khan bisi bhoi laga karone Jisu taikhan ke ki kobo lage etu najana hoise. ⁷ Titia ekta badal ahikena taikhan ke dhaki loise, aru badal pora ekta awaj pora koise, “Etu Ami laga morom thaka Putro ase. Taike huni bhi.†” ⁸ Titia

* 9:5 9.5 Shika manu. † 9:7 9.7 I Pet. 1:17; Psa. 2:7.

tinjon chela khan achanak ephale-uphale saise aru Jisu he taikhan logote thaka paise, aru kunke bhi dikha nai.

⁹ Jitia taikhan pahar pora niche ahi thakise, Jisu taikhan ke hukum dikene koise jitia tak Manu laga Putro mora pora jee uthi najai, titia tak taikhan ki dikhise etu kunke bhi nakobo.

¹⁰ Taikhan etu kotha lukai rakhidise aru “Mora pora jee uthi naja tak” ki motlob ase koi kene kotha kori thakise. ¹¹ Aru taikhan Taike hudise, “Kile, likha khan Elijah he poila ahibo lage koi?‡”

¹² Tai taikhan ke jowab dikena koise, “Elijah he poila ahibo lage, aru sob thik tak kori dibo, etu hosa ase. Kintu Manu laga Putro laga kotha te Tai bisi dukh koribo aru Taike ghin hobo etu kele Isor kotha te likhi rakhise? ¹³ Kintu Moi tumikhan ke koi dibo Elijah ahi jaise, aru taikhan taikhe ki kori bole mon thakise etu kori dise, jineka Tai nimate bhi kotha likhi rakhi kene ase.”

Dusto Atma Pora Dhora Ekjon Ke Changai Kora

¹⁴ Aru jitia Tai chela khan logote ahise, bisi manu taikhan laga age pichete thakise, aru niyom likha khan taikhan logote kotha te lagi thakise. ¹⁵ Aru jitia manu khan Taike dikhise, taikhan asurit hoi kene Jisu logot polai ahise aru Taike salam dise. ¹⁶ Aru Tai pora chela khan ke hudise, “Tumikhan taikhan logote ki kotha te lagi ase?” ¹⁷ Ekjon bisi manu thaka jaga pora Taike jowab di koise, “Shika manu, moi laga chokra ke Apuni logot loi anise, tai logot gunga atma ase. ¹⁸ Aru kot te taike dhure, ta te taike

‡ 9:11 9.11 Mal. 4:5-6.

phelai diye aru tai laga mukh pora phen ulai, aru daat kamuri kene tai laga bodon to tan hoi thake. Aru moi Apuni laga chela ke etu khedai dibole koise, kintu taikhan para nai.” ¹⁹ Jisu taike jowab dise, “Tumi biswas nakora yug khan, Moi kitia tak tumikhan logote thakibo? Kitia tak Moi tumikhan ke sai thakibo? Taike Moi logote loi anibi.” ²⁰ Aru taikhan chokra ke Tai logote anise. Aru jitia etu gunga atma pora Jisu ke dikhise, joldi tai chokra ke dukh dise, aru matite girai dise, aru tai laga mukh pora phen ulaise. ²¹ Etu karone Jisu tai laga baba ke hudise, “Tai kitia pora bemar ase?” Aru tai koise, “Bacha homoi pora ase. ²² Aru bar-bar taike khotom kori bole kitia ba jui te aru kitia ba panite girai di thake, kintu Apuni he kiba koribo parile, morom pora amikhan ke modot koribi.” ²³ Aru Jisu taike koise, “ ‘Jodi Apuni pare koile koi ase?’ Biswas manu khan karone to sob koribo paribo.” ²⁴ Joldi chokra laga baba kandi kene koise, “Hey Probhu, moi biswas ase, moi laga biswas laga upai kori dibi!” ²⁵ Jitia bhir khan polai ahi thaka Jisu dikhise, titia Tai dusto atma ke galise, aru koise, “Tumi nahuna aru gunga atma, Moi tumike hukum di ase, tai pora ulai jabi, aru kitia bhi tai bhitor te aru najabi.” ²⁶ Titia gunga atma taike bisi dukh dise aru jor pora hala kori kene ulai jaise, aru chokra to mora nisena hoise, etu dikhikena bisi manu eneka koise, “Tai mori jaise.” ²⁷ Kintu Jisu etu chokra laga hath dhori kene taike uthai dise aru tai khara hoi jaise. ²⁸ Pichete, jitia Jisu ghor bhitor te ahise, Tai laga chela khan alag pora Taike hudise, “Amikhan

kele etu ke khedabo para nai? ²⁹ Etu karone Tai taikhan ke koise, “Etu sob prathana aru upwas pora he koribo paribo.”

Mora Aru Punoruthan Laga Aru bhi Age Te Jisu Koi Dise

³⁰ Titia Jisu aru chela khan ta te pora ulaikene Galilee paar kori jai asele, kintu Tai kun manu ke bhi janibo dibole itcha kora nai. ³¹ Kelemanee Tai nijor chela khan ke sikhai thakise aru koise, “Manu laga Putro ke manu hathte dhori dibo, aru taikhan Taike morai dibo; aru tin din pichete arubi Tai jee uthijabo.” ³² Kintu taikhan etu kotha laga motlob bujhi bo pora nai, aru Taike hudibole bhi bhoi lagi thakise.

Sob Pora Dangor Kun Ase

³³ Titia Tai Capernaum te ahise, aru jitia Tai ghor bhitor te ahise, Tai taikhan ke hudise, “Tumikhan rasta te ki kotha loi huda-hudi kori asele?” ³⁴ Kintu taikhan eku bhi kowa nai. Kelemanee taikhan rasta te ekjon-ekjon logote kun he dangor hobo etu kotha kori thakise. ³⁵ Aru bohi kene, Tai laga baroh jon chela ke mati kene koise, “Jodi kunba prothom hobole mon korile tai sob pora piche hobi, aru sob laga noukar hobi.” ³⁶ Titia Tai ekta huru bacha loi taikhan majote rakhise aru bacha ke Tai laga hathte loi kene taikhan ke koise. ³⁷ “Jun Ami laga naam te eitu khan nisena bacha ke grohon koribo, tai Moike grohon kori loise, aru jun Moike grohon koribo, tai Moike he nohoi kintu Moike Jun pathaise, Taike bhi grohon kori loise.”

Amikhan Ke Birodh Nakora Khan Amikhan Logot Ase

³⁸ John Taike koise “Shika manu, kunba ejkon pora Apuni laga naam te bhoot khedai thaka paisele, aru amikhan taike mana kori dise, kelemane tai amikhan logote nathaka manu huwa karone.” ³⁹ Kintu Jisu koise, “Taike mana na koribi, kelemane eneka kun bhi nai, jun Ami laga naam te asurit kaam koribo, aru pichete Moike biya nokobo. ⁴⁰ Kelemane jun bhi Amikhan ke hinsa nakore, tai Ami phale ase. ⁴¹ Kelemane jun bhi tumikhan ke Khrista laga koi kene Ami naam pora ekta gilasa pani bhi khilai le, Moi tumikhan ke hosa kobo, tai pabo thaka naharabo.

Paap Kori bole Porikha Ahibo

⁴² Kintu jun bhi, Moike biswas kora chutu ekjon ke bhi biya kori dile, tai karone dhan pisi thaka dangor pathor to tai gola te bandi kene samundar te phelai diya he bhal hobo. ⁴³ Jodi tumi laga hath pora tumike paap koribo di thake, etu hath kati phelai dibi, duita hath loi norokte kitia bhi khotom nohua jui te juwa pora tumi hath nathakile bhi jibon te juwa he bhal hobo. ⁴⁴ Ta te taikhan laga puka namora aru jui bhi kitia bhi nabhutibo. ⁴⁵ Aru jodi tumi laga theng pora tumike paap koribo di thake, etu ke kati phelai dibi. Duita theng loi norokte kitia bhi bhuti bo napara jui te juwa pora tumi lengra hoile bhi jibon te juwa he bhal hobo. ⁴⁶ Ta te taikhan ke kamura puka namore aru jui kitia bhi nabhute. ⁴⁷ Aru jodi tumi laga suku karone tumike paap koribo di thake koile, suku ulaikena

phelai dibi. Duita suku loi kene norokte juwa pora to ekta suku loi kene Isor laga rajyote juwa he bhal hobo. ⁴⁸ Ta te taikhan ke kamura puka namore aru jui bhi kitia bhi nabhute\$. ⁴⁹ Karone sob jui pora nimokia kori dibo. ⁵⁰ Nimok to bhal ase, kintu nimok bhi tai laga swadh harai jaile tumi ki pora etu ke aru swad koribo? Tumi nijorke nimok nisena rakhibi, aru shanti pora ek-dusra logote thakibi.”

10

Shadi Pora Chari-Chari Laga Sikha

¹ Titia Jisu Capernaum chari kene Jordan Nodi paar korise aru Judea desh phale ahi jaise, aru bisi manu Tai logote joma hoise, aru hodai nisena Tai taikhan ke sikhai di thakise. ² Kunba Pharisee khan Taike porikha kori bole kiba hudise, “Ki karone mota tai maiki ke chari dibole niyom ase?” ³ Aru Tai taikhan ke jowab dikene koise, “Moses tumikhan ke ki hukum disele?” ⁴ Taikhan koise, “Moses koise chari bole laga kagos likhi kene taikhe chari dibole pare.*” ⁵ Aru Jisu taikhan ke koise, tumikhan laga mon tan huwa karone tai tumikhan ke etu hukum dise. ⁶ Kintu sristi laga shuru pora ‘Isor he mota aru maiki bonai dise.†’ ⁷ ‘Karone mota to nijor ama aru baba chari kene tai nijor maiki logote mili jabo. ⁸ Aru tai duijon eke sharir hoi jabo.’

§ 9:48 9.48 Isa. 66:24. * 10:4 10.4 Due. 24:1-3 † 10:6 10.6 Gen. 1:27; Gen. 5:2

Karone taikhan duijon nohoi kintu ekta sharir hoi jabo‡. ⁹ Karone ki Isor pora milai dise, etu ke manu pora alag nokoribi.” ¹⁰ Jitia taikhan ghor te thakise Tai chela khan Taike aru etu kotha hudise. ¹¹ Karone Tai taikhan ke koise, “Jun bhi tai maiki ke chari dikene aru dusra ke shadi korile tai maiki laga bhirodh te bebichar kori ase. ¹² Aru jodi maiki bhi nijor mota chari kene dusra logote shadi korile tai bhi bebichar kori ase.”

Bacha Khan Moi Usorte Ahibole Dibi

¹³ Ek din kunba manu khan pora taikhan laga bacha khan ke Tai usorte loi anise, taikhan laga matha te Tai laga hath rakhi kene asirbad dibole nimite, kintu chela khan pora taikhan ke rukhai dise. ¹⁴ Kintu Jisu etu dikhikena koise, “Bacha khan ke Moi logote ahibo dibi taikhan ke narukha bhi, kelemane Isor laga rajyo to eneka khan laga he ase. ¹⁵ Moi hosa pora tumikhan ke koi ase, jun pora nije ke ekta chutu bacha nisena kori kene Isor laga rajyo ke swekar nakore, tai ji hoile bhi ta te gusibo na paribo.” ¹⁶ Aru Tai hath taikhan uporte rakhi kene asirbad dise.

Dhuni Jawan Putro Ekjon

¹⁷ Aru jitia Jisu rasta te jai asele, ekjon polai ahise, aru Tai samne te athukari kene Taike hudise, “Bhal Shika manu, anonto jibon pabole moi ki koribo lage?” ¹⁸ Titia Jisu taike koise, “Tumi Moike kele bhal koi ase? Isor he nohoile kun bhi bhal nohoi. ¹⁹ Tumi niyom khan jani ase: ‘Manu namora bhi, bebichar na koribi! Chor na koribi, misa gawahi nadibo, manu ke nothogabi,

‡ **10:8** 10.8 Gen. 2:24

tumi baba ama ke sonman koribi.Š' " 20 Aru tai jowab di Taike koise, "Shika manu, moi etu sob jawan thaka somoi pora mani ahise." 21 Titia Jisu taike morom pora saikene taike koise, "Tumi ekta kaam he puncha nai, jabi aru tumi laga ki ase, sob bikiri kori kene dukhia khan ke di dibi, aru tumi sorgote dhun pai jabo, aru ahikena Ami laga piche koribi." 22 Kintu tai etu kotha huni kene dukh hoise, aru mon biya hoi kene jai jaise, kelemane tai bisi dhuni asele.

23 Titia Jisu Tai age piche saikene chela khan ke koise, "Dhuni manu Isor laga rajyote gushi bole bisi digdar hobo!" 24 Aru chela khan Tai kotha pora asurit hoise. Kintu Jisu taikhan ke aru koise, "Bacha khan, Isor laga rajyote gushi bole kiman bhi digdar ase! 25 Isor laga rajyote dhuni manu gushi bole para to ekta uth pora bhiji laga suku paar ulai juwa he bisi sosta hobo." 26 Aru taikhan ekdom asurit hoi kene ekjon-ekjon logote kotha korise, "Tinehoile kun poritran pabo?" 27 Kintu Jisu taikhan ke saikene koise, "Manu pora hoile etu na paribo, kintu Isor he paribo*. Kelemane Isor nimate sob para ase."

28 Titia Peter Taike koise, "Sabi amikhan to sob chari kene Apuni laga piche korise. 29 Titia Jisu koise, "Moi tumikhan ke hosa kobo, kun bhi Moi karone aru susamachar karone Tai ghor nohoile bhai-bhoini, ama-baba, nijor bacha, aru kheti mati bari chari dile; 30 taikhan sob ek-sou guna pora bhi bisi pabo: ghor, aru bhai, bhoini, ama aru bacha aru kheti baari khan, aru aha yug te

Š 10:19 10.19 Exo. 20:12-16; Rom. 13:9 * 10:27 10.27 Job 42:2; Luke 1:37

anonto jibon pabo. ³¹ Kintu bisi manu jun khan age ase, taikhan piche hoi jabo, aru jun piche ase taikhan age hoi jabo.”

Jisu Tai Nijor Mora Laga Kotha Age Pora Koi Diya

³² Kitia Jisu aru chela khan Jerusalem te jai thakise, Jisu taikhan sob laga age hoi kene jai thakise. Taikhan asurit hoise, aru Tai laga piche kori thaka khan bhoi lagi thakise. Titia Tai ekbar aru baroh jonke kinar te loijai kene Tai uporte ki ahibole ase etu taikhan ke koise. ³³ “Sabi, Amikhan Jerusalem te jai ase, aru Manu laga Putro ke dhorikena mukhyo purohit aru niyom likha khan laga hathte di dibo, aru taikhan Taike golti dibo aru Taike morai dibo. Taike biswas nakora khan laga hathte dikena morai dibo. ³⁴ Aru taikhan Taike ninda kori kene maribo, kintu tin din pichete Tai jee uthibo.”

James Aru John Pora Manga

³⁵ Titia Zebedee laga Putro James aru John duijon Tai logote ahikena koise, “Shika manu, ami duijon kiba mangibo, etu kori dibi.” ³⁶ Tai duijon ke koise, “Moi tumikhan karone ki kori dibo?” ³⁷ Tai duijon pora Jisu ke koise, “Kitia Apuni singhason te bohobi, Apuni laga mohima pora bhorta thaka rajyote, titia, duijon nimite, ekjon Apuni laga dyna hath aru dusra Apuni laga baya hathte bohobo dibi.” ³⁸ Kintu Jisu taikhan ke koise, “Tumi duijon ki mangi ase, etu najani kene mangi ase, duijon Moi khabole thaka kup pora khabo paribo, aru Moi ki baptizma pora baptizma lobole ase etu paribo? ³⁹ Duijon

Taike koise, “Amikhan paribo.” Titia Jisu taikhan ke koise, “Duijon Ami khabole thaka kup pora khabole to hosa ase, aru Moi ki baptizma pora baptizma kori bole ase, etu bhi hobo. ⁴⁰ Kintu Ami laga dyna aru baya phale bohi bole to Moi dibo napare, kintu etu to kun nimate rakhikena ase, tai he pabo.” ⁴¹ Aru jitia dos jon chela khan etu kotha hunise, taikhan James aru John duijon ke bisi khong hoise. ⁴² Kintu Jisu taikhan ke mati anikena koise, “Tumikhan jani ase na, Porjati khan kun taikhan laga adhikari khan ase koi kene mane, eitu khan pora he taikhan uporte raj kore aru taikhan laga daruga khan pora taikhan uporte adhikar cholai thake. ⁴³ Kintu tumi majot to eneka nahobi, kintu jun dangor hobole mon kore tai tumi laga nokor hobo dibi. ⁴⁴ Aru jun age hobole mon kore taike sob laga ses te thakibo dibi. ⁴⁵ Keleman Manu laga Putro bhi sewa lobole aha nohoi, kintu sewa kori bole aru bisi manu ke bacha bole nijor jibon dibole ahise.”

Jisu Pora Andha Bartimaeus Ke Changai Kora

⁴⁶ Titia taikhan Jericho sheher te ahise. Aru ta te pora Tai aru chela khan aru taikhan logot bisi manu Jericho pora ulai jai thakise, titia Timaesus laga chokra Bartimaeus koi kene andha ekjon rasta kinar te bohi kene bhikh mangi thakise. ⁴⁷ Aru jitia tai etu Nazareth Jisu ase koi kene janise, tai hala kori kene koise, “Jisu, David laga Putro, moike daya koribi!” ⁴⁸ Titia bisi manu taike gali dikena chup thaki bole koise. Kintu tai arubi jor pora hala kori kene koise, “David laga Putro, moike daya koribi!” ⁴⁹ Titia Jisu rukhise

aru taikhe mati bole koise. Etu nimate taikhan pora andha manu ke koise, "Mon dangor koribi! Uthibi! Tai tumike mati ase." ⁵⁰ Aru tai uthikena tai bahar te lagai thaka kapra ke ulaikene phelai dise aru Jisu logote ahise. ⁵¹ Aru Jisu taikhe koise, "Moi tumi karone ki kori dibo?" Andha manu Taikhe jowab dise, "Rabbi, moike dikhi pabo dibi." ⁵² Titia Jisu taikhe koise, "Jai jabi. Tumi laga biswas he tumike bhal kori dise." Aru etu loge-logote tai dikhibow parise, aru Jisu laga piche korise.

11

Jitikena Juwa

¹ Aru jitia Jisu aru chela khan Jerusalem te, aru Oliv Pahar kinar Bethphage aru Bethany nogorkhan te ahise, aru taikhan age jabile Jisu pora duijon chela ke pathaise. ² Aru Tai taikhan ke koise, "Jabi usor thaka bosti te, aru tumi ta te puncha loge-loge gadha puwali juntu uporte kun manu bhi boha nai, etu bandhi thaka pabo. Etu ke Khuli Kena loi anibi. ³ Aru jodi kunba tumike kunba eneka hude, 'Kile eneka kori ase?' Titia taikhe kobi, 'Probhu ke etu lagi ase, titia tai joldi pathai dibo.' " ⁴ Karone taikhan jaise aru etu gadha puwali ke dorja bahar rasta te bandha paise, aru taikhan khuli loi anise. ⁵ Kintu kunba manu ta te khara khan pora hudise, "Etu ki kori ase, gadha puwali ke kele khuli ase?" ⁶ Aru Jisu pora kowa nisena taikhan etu manu ke koise, etu pichete taikhan ke jabile dise. ⁷ Titia taikhan gadha puwali loi anise, aru taikhan nijor kapra etu uporte bichai dise, aru Tai etu uporte bohi

jaise. ⁸ Aru bisi manu nijor kapra rasta te bichai dise, aru dusra khan ghas laga daal kati ani rasta te bichai dise. ⁹ Tai laga age ja-a khan aru piche kora khan sob hala kori kene koise,

“Hosanna dhoinyo ase jun Probhu laga naam te ahise.

¹⁰ Probhu naam pora ami laga baba David laga rajyo loi aha ke dhoinyo!

Hosanna Tai laga naam untcha koribi!*

¹¹ Aru Jisu Jerusalem sheher te ahi kene mon-doli te jaise, aru Tai ghuri kene sob saise, aru bisi deri huwa karone, Tai baroh jonke loi kene Bethany te jai jaise.

Jisu Pora Dimoru Gash Ke Shrap Diya

¹² Aru dusra din jitia taikhan Bethany pora ulai ahise, Tai bhuk lagise. ¹³ Aru dur pora ekta dimoru ghas te pata thaka dikhi kene ta te kiba pabo bhabi kene Tai etu usor jaise. Kintu Tai khali pata he thaka paise, kelemane etu somoi to dimoru guti dibole somoi nohoi, ¹⁴ Titia Jisu pora etu ghas ke koise, “Etiya pora kun bhi tumi laga phol aru nakhabo.” Aru Tai chela khan etu kotha kowa hunise.

¹⁵ Etu pichete taikhan Jerusalem sheher te ahise aru Jisu mondoli bhitor te jaise. Ta te bikiri kori thaka aru kini thaka khan ke bahar te ulai dise, aru taikhan laga mezkhan ultai dise aru kabotar bikiri kori thaka khan laga chowki bhi ultai dise. ¹⁶ Aru Tai kunke bhi eku jinis mondoli bhitor te loi aha-juwa kori bole diya nai. ¹⁷ Titia

* **11:10** 11.10 Mat. 23:39.

Tai sikhai dikene koise, “Isor kotha te eneka likha ase nohoi,

‘Ami laga ghor to sob jati khan karone prathana ghor hobo?’[†]

Kintu tumikhan etu ke chor dokait laga ghor bonai dise.”

¹⁸ Aru mukhyo purohit khan aru niyom likha khan etu hunise aru Taike khotom kori bole bisarise. Taikhan bhoi korise, kelemane sob manu Tai laga kotha huni kene asurit hoi thaka karone. ¹⁹ Aru jitia saam ahise, Tai sheher pora bahar te ulai jaise.

Sukhi Juwa Dimoru Gash Pora Sikha

²⁰ Aru dusra din phojur jitia taikhan jai asele, taikhan etu dimoru ghas to tai laga jor tak sukhi ja dikhise. ²¹ Aru Peter laga monte ahise, aru tai Jisu ke hudise, “Rabbi, sabi! Dimoru ghas junke Apuni shrap disele, etu sukhi jaise.” ²² Karone Jisu taikhan ke koise, “Isor ke biswas rakhibi. ²³ Kelemane Moi tumikhan ke hosa kobo, jun bhi etu ‘pahar ke yate pora ulai samundar te dubi jabi,’ eneka chinta nathakikena etu hoi jabo biswas thakile, etu bhi hoi jabo. ²⁴ Karone Moi tumikhan ke kobo, tumikhan prathana te ki mangise, etu sob paise koi kene biswas korile etu pabo. ²⁵ Aru jitia tumikhan prathana kori bole hoi, jodi tumi laga monte kunba ke biya pai thakile, taikhe maph kori dibi, eneka korise koile tumi laga sorgote thaka Baba bhi tumi laga golti maph kori dibo. ²⁶ Kintu jodi tumikhan manu ke

[†] **11:17** 11.17 Isa. 56:7; Jer. 7:11; Luke 19:46.

maph nadile tumi laga sorgo Baba bhi tumikhan laga golti maph nadibo.”

Jisu Laga Adhikar Huda

²⁷ Jitia Jisu aru chela khan aru Jerusalem sheher te ahise, aru Tai mondoli te berai thakise, titia mukhyo purohit khan, niyom likha khan aru bura khan tai logote ahise. ²⁸ Aru taikhan hudise, “Apuni ki hokti pora etu sob kori ase Aru kun Tumike etu kori bole dise?” ²⁹ Kintu Jisu taikhan ke jowab di koise, “Moi bhi tumikhan ke ekta kotha hudibo. Moike kobi, aru Moi bhi tumikhan ke kobo Moi ki takot pora eitu khan kori ase. ³⁰ John pora baptizma diya to sorgo pora ahise, na manu pora ahise? Moike jowab dibi.” ³¹ Titia taikhan majote kotha patise, “Jodi amikhan sorgo pora ase koile, Tai kobo, ‘Tumikhan kele taike biswas kora nai?’ ³² Kintu jodi amikhan ‘Manu pora’ koile” Bisi manu pora John ke bhabobadi mani thake nimate taikhan bhoi kori thakise. ³³ Karone taikhan Jisu ke koise, “Amikhan najane.” Karone Jisu taikhan ke koise, “Moi bhi tumikhan ke Moi ki laga takot pora etu sob kaam kori ase nokobo.”

12

Kheti Kora Khan Dristanto

¹ Titia Jisu dristanto pora manu khan ke koise, “Ekjon manu draikha baari ekta bonaise, aru char kona phale bera lagai dise, aru ros khunda jaga bonaise, aru machang bonai kene kunba kaam kora manu ke theka di dikena tai to safar

te ulai jaise.* ² Jitia ros ulabole somoi ahise, malik pora nokor ke angur pabo pare bhabi kene draikha baari te kaam kora manu khan logote pathaise. ³ Kintu taikhan pora nokor ke dhori kene marise, aru taike khali hath pathai dise. ⁴ Titia tai aru dusra ekjon nokor ke pathaise, hoilebi taikhan etu nokor laga matha te pathor pora mari dikena jokhom kori dise aru sorom khilai se. ⁵ Aru tai dusra ekjon ke pathaise, aru etu bar to nokor ke morai dise. Tai bisi manu ke pathaise: kintu taikhan arubi kunba ke marise, aru dusra khan ke morai dise. ⁶ Tai logot pathabole ekjon he thaki jaise, tai laga ekjon morom thaka chokra. Tai eneka bhabona korise, 'Taikhan bhi ami laga chokra ke to morom koribo.' ⁷ Kintu kaam kora manu taikhan bhithor te kotha korise, 'etu to uttoradhikari ase, ahibi amikhan taike morai dibo, aru tai laga sob to amikhan laga hoi jabo.' ⁸ Aru taikhan taike loijai kene mari dise, aru taike draikha baari bahar te phelai dise. ⁹ Karone etiya draikha baari laga malik ki koribo? Tai ahi kene kaam kora manu khan ke khotom kori dibo, aru draikha baari to dusra ke di dibo. ¹⁰ Tumikhan Shastro te porha nai naki?

'Pathor mistiri khan pora chari diya pathor kona te thakise,
Aru etu he ghor khara kora laga asol pathor hoi jaise.

¹¹ Etu Probhu pora he hoise,
Ami laga suku pora sabole bisi asurit ase.†' "

* **12:1** 12.1 Isa. 5:1-2 † **12:11** 12.11 Psa. 118:22-23; Mat. 21:42; Luke 20:17; Acts 4:11; 1 Pet. 2:7.

¹² Aru mukhyo purohit khan, niyom hika khan aru bura khan buji jaise Tai taikhan bhirodh te etu dristanto koise, aru taike dhori bole bhabisele, kintu manu ke bhoi pora chari dise aru jai jaise.

Caesar Logot Khajana Diya

¹³ Titia Yehudi cholauta khan Jisu laga kotha pora Taike dhori bole kunba Pharisee aru Herod laga manu khan ke Tai logote pathaise. ¹⁴ Aru taikhan koise, “Shika manu, amikhan jane Apuni hosa ase, aru kunke bhi bhoi nakore, kelemane Apuni manu laga mukh saikene kotha nakore, kintu Isor laga hosa rasta he sikhai, karone Caesar‡ ke masul diya to thik ase na nai? Moi khan etu dibo lage na nai?” ¹⁵ Kintu Tai taikhan laga chalak jani kene koise, “Kile Moike porikha kori ase? Ekta chandi poisa anikena Moike dikhabi.” ¹⁶ Karone taikhan ekta anise, aru Tai koise, “Etu kun laga chehera aru naam ase?” Taikhan koise, “Caesar laga ase.” ¹⁷ Aru Jisu taikhan ke jowab dise, “Eneka hoile ki Caesar laga ase, Caesar ke di dibi, aru ki Isor laga ase, etu Isor ke dibi.” Aru taikhan Taike asurit hoise.

Sadducee Khan Pora Punoruthan Laga Hudise

¹⁸ Titia Sadducee jun khan mora pora jee na uthibo koi, Tai logote ahise. Aru Taike hudise, ¹⁹ “Shika manu, Moses he amikhan ke etu niyom likhi disele, jodi kunba bhai bacha nathaki kene mori jai, aru tai laga maiki to thake, titia tai bhai he etu maiki ke lobo aru tai bhai laga naam age loi jabole koise. ²⁰ Tinehoile age te

‡ **12:14** 12.14 Rome raja laga naam.

sat-ta bhai asele, prothom bhai shadi kori kene bacha nathaki kene mori jaise. ²¹ Aru dusra bhai etu ke loise aru etu bhi bacha nohoi kene mori jaise, aru tisra bhai ke bhi thik eneka he hoise. ²² Aru sat-ta bhai sob taike loise aru bacha nathaki kene sob mori jaise, pichete etu maiki bhi mori jaise. ²³ Karone jee utha pichete tai kun laga maiki hobo? Keleman tai sat jon bhai laga maiki thakisele.” ²⁴ Jisu taikhan ke koise, “Tumikhan Shastro te likha kotha khan aru Isor laga hokti najana karone golti kori thake nohoi? ²⁵ Kelemane jitia taikhan mora pora jee uthibo taikhan shadi nakoribo, kintu sorgote Isor laga duth nisena thaki jabo. ²⁶ Kintu mora pora jee utha kotha khan nimate tumikhan Moses laga kitab te porha nai, joli thaka jhari te, kineka Isor he taike eneka koisele, ‘Moi Abraham laga Isor, Isaac laga Isor, aru Jacob laga Isor ase?’” ²⁷ Isor to mora khan laga Isor nohoi, kintu jinda khan laga Isor ase etu karone tumikhan bisi dangor golti kori thake.”

Dangor Hukum

²⁸ Titia ekjon niyom likha jon pora taikhan etu kotha kori thaka hunise. Aru Jisu pora etu laga thik jowab diya huni kene, tai Jisu ke hudise, “Sob pora prothom hukum to ki ase?” ²⁹ Jisu taike koise, “Sobse poila, ‘Huni bhi Israel, sob pora prothom hukum to amikhan laga Probhu he Isor ase, aru ekjon he Probhu ase*.’” ³⁰ Aru tumi pura mon, pura atma, pura dimag, aru pura

§ 12:26 12.26 Exo. 3:2-6. * 12:29 12.29 Deu. 6:4.

takot pora Probhu Isor ke morom koribi.† 31 Aru dusra hukum to etu kowa ase, ‘Tumi laga ghor usor manu khan ke nijor nisena morom koribi.‡’ Etu duita pora dusra dangor hukum aru nai.”

32 Karone likha manu Taike koise, “Bhal Shika manu! Apuni hosa pora koi dise, kelemane Isor ekjon he ase, aru Taike chari kene dusra nai.

33 Aru pura mon, pura dimag, pura atma, aru pura takot pora Isor ke morom kora, aru usor manu khan ke nijor nisena morom kora to daan kora aru bolidan diya pora bhi bisi dangor ase.§”

34 Jitia Jisu tai bhal jowab diya dikhise, Tai taike koise, “Tumi Isor laga rajyo pora dur nohoi.” Etu pichete, kun bhi Jisu ke aru kiba hudibole mon dangor kora nai.

Khrista Kun Laga Putro Ase

35 Pichete, Jisu mondoli laga bahar jagate sikhai thakise, Tai hudise, “Kanun likha khan to kineka Khrista to David laga chokra ase koi thake?” 36 Kelemane David to Pobitro Atma te bhorta hoi kene eneka koise,

‘Probhu he ami laga Probhu ke koise,
“Ami laga dyna hath phale bohi thakibi,
Jitia tak Moi pora tumi laga dushman khan
ke tumi laga theng nichete nadibo, titia
tak.*’ ”

37 David tai nijor Taike ‘Probhu’ koise, to David laga chokra tai kineka hobo? Aru bisi manu khan Tai kotha ke shanti pora huni asele.

† **12:30** 12.30 Deu. 6:5. ‡ **12:31** 12.31 Lev. 19:18. § **12:33** 12.33 Deu. 6:4-5; Lev. 19:18; Hos. 6:6. * **12:36** 12.36 Psa. 110:1.

Kanun Likha Khan Pora Hoshiar Koribi

³⁸ Titia Jisu sikhai thaka somoite taikhan ke koise, “Likha manu khan pora hoshiar thakibi, jun kapra lamba kori lagai berai thake, aru bajar te salam diya bhal pai, ³⁹ mondoli te bhal jaga, aru kha luwa te bhal jaga bisara khan. ⁴⁰ Taikhan bidhowa khan laga ghor hajam kori diye, aru bahana pora lamba prathana kori thake, eitu khan bisi dangor saja pabo.”

Ekjon Bidhowa Laga Daan

⁴¹ Titia Jisu mondoli te daan diya daba usorte bohi kene sai thakise jun khan ahikena daba te poisa haali thakise. Aru dhuni khan bisi-bisi di thakise. ⁴² Titia gorib bidhowa ahikena duita paisa dise. ⁴³ Titia Tai chela khan ke mati anikena koise, “Moi tumikhan ke hosa kobo. Manu khan daba te daan diya te etu gorib bidhowa he sob pora bisi dise. ⁴⁴ Keleman sob manu taikhan nijor dhun bisi thaka pora dise. Kintu tai to bisi nathakilebi tai logote ki ase etu sob dise, motlob tai jinda thakibo laga sob di dise.”

13

Mondir Nosto Kotha Jisu He Age Te Kowa

¹ Jitia Jisu mondoli pora ulaikene jai thakise, chela ekjon Taike koise, “Sikha manu, sabi, kineka bhal asurit pathor ase etu, aru kiman asurit ghor ase yate? ² Aru Jisu jowab di taike koise, “Tumi etu dangor ghor dikhi ase? Yate ekta pathor bhi ekta uporte nathiki jabo, sob pathor ke girai dibo.”

Yug Hekh Homoi Laga Chihna

³ Titia Tai mondoli samne te Oliv Pahar te bohi asele, titia Peter, James, John aru Andrew taikhan lukaikene Taike hudise. ⁴ “Etu sob kotha kitia hobo, etu amikhan ke koi dibi, aru kitia etu sob kotha pura hobole hoi, etu laga chihna kineka hobo?” ⁵ Aru Jisu taikhan ke jowab di koise, “Hoshiar hobi, kun pora bhi tumikhan ke thogabo nadibi. ⁶ Kelemanee bisi manu Ami laga naam loi ahikena kobo, ‘Moi he Tai ase,’ aru bisi manu ke thogai loijabo. ⁷ Kintu jitia tumikhan lorai aru mara-mari laga awaj hunibo, titia chinta nokoribi, kelemanee eitu khan hobole dorkar ase, kintu etu bhi hekh somoi nohoi. ⁸ Kelemanee ekta desh pora dusra desh ke bhirodh koribo, ekta rajyo pora dusra rajyo ke bhirodh koribo, aru jaga-jagate mati hili bo, aru titia khabole eku napabo. Etu sob to bacha jonom hobole shuru te bikha nisena ase.

⁹ Tumikhan nijor hoshiar thakibi. Ami nimate tumikhan ke dhori kene sabhakhn te aru mondoli khan te di dibo, tumikhan ke maribo, pitibo, aru tumikhan ke sorkar aru raja khan usorte loijabo, taikhan nimate gawahi hobole. ¹⁰ Kintu prothom te susamachar sob jati ke prochar kori dibo lagibo. ¹¹ Jitia taikhan pora tumikhan ke dhori kene manu laga hathte di dibo, tumikhan ki kobo lage, etu nimate chinta na koribi, kintu tumikhan utu somoite ki kobo lage, etu he koi dibi, kelemanee tumikhan pora nokobo, kintu Pobitro Atma pora he kobo. ¹² Titia bhai pora bhai ke dhurikena morai dibo, aru baba pora bacha ke morai dibo, bacha khan pora nijor ama-

baba laga bhirodh hoi kene taikhan ke morai dibo*. ¹³ Aru Ami karone sob tumikhan ke ghin koribo, kintu hekh tak jun dhorjo thakibo paribo tai he poritran pabo.

Ghin Laga Letera Bostu

¹⁴ Kintu jitia paap laga ghin kaam khotom kora ke kuntu jagah te khara nathakibole lage ta te khara kora tumikhan dikhile- kun porhibo tai he bujhi bole dibi- titia jun Judea te ase, pahar te polai jabi†, ¹⁵ Jun ghor uporte ase, taikhe niche najabole aru jai kene ghor bhitor pora kiba bahar te ulabole nadibi. ¹⁶ Aru jun kheti te ase, taikhe nijor kapra lobole ghuri ahibo nadibi. ¹⁷ Kintu etu dinte jun maiki khan pet te bacha bukhi se, aru jun bacha dudh khilai thakise, taikhan nimate hai ase. ¹⁸ Etu sob thanda dinte nohobo nimate prathana kori thakibi. ¹⁹ Kelemanee etu din eneka dukh din hobo, jitia shuru pora Isor sristi bona homoi pora aji tak eneka dukh aha nai, aru kitia bhi nohobo. ²⁰ Aru jodi Probhu he etu din to khata kori nadile kunbi bachibole nohoi, kintu basi luwa khan karone Tai etu din khan khata kori dise. ²¹ Aru jodi kunba tumikhan ke kobo, 'Sabi, Khrista yate ase nohoile, 'Sabi Tai ta te ase,' etu biswas na koribi. ²² Kelemanee misa khrista aru misa bhabobadi ahibo, aru chihna aru asurit dikha bo, aru jodi parile basi luwa khan ke bhi thogai loijabo. ²³ Kintu hoshiar thakibi, sabi Moi age pora tumikhan ke koi ase.

Manu Laga Putro Aha

* **13:12** 13.12 Luke 21:16; Mic. 7:6 † **13:14** 13.14 Dan. 11:31; 12:1

24 Kintu etu dukh din laga pichete
Suryo andhera hoi jabo,
Aru chand bhi ujala nadibo‡.

25 Titia akas laga tara bhi giri jabo,
Aru akas laga hokti hili jabo§

26 Titia Manu laga Putro dangor hokti aru
mohima hoi badal pora aha taikhan dikhibo*.

27 Titia Tai duth khan ke pathai kene prithibi laga
kona pora akas laga kona tak, char phale hawa
pora Tai basi luwa sobke joma kori lobo†.

Dimoru Gash Laga Dristanto

28 Titia dimoru ghas pora dristanto sikhi lobi,
jitia ghas laga daal komoliya hoi, aru pata
ulabole hoi, gorom din usor hoise koi kene
tumikhan jani jai. 29 Etu karone jitia etu sob
hoi thaka dikhile jani lobi Jisu‡ dorja usorte ahi
jaise. 30 Moi tumikhan ke hosa kobo, jitia tak
etu sob kotha pura nohobo, titia tak etu yug laga
manu khan harai najabo. 31 Akas aru prithibi
harai jabo, kintu Ami laga kotha khan kitia bhi
nahaarabo§.

Din Aru Homoi Kunbi Najane

32 Kintu etu din aru etu somoi kun bhi najane,
sorgodoth khan bhi, aru Putro bhi najane, kintu
khali Baba he jane.

‡ **13:24** 13.24 Isa. 13:10. § **13:25** 13.25 Isa. 34:4. * **13:26**
13.26 Dan. 7:13; Rev. 1:17. † **13:27** 13.27 Due. 30:4; Matt. 24:31
‡ **13:29** 13.29 Manu laga Putro. § **13:31** 13.31 Isa. 40:8; Luke
21:33.

³³ Hoshiar pora sai thakibi, uthi kene prathana kori thakibi kelemane tumikhan najane etu so-moi kitia ahibo. ³⁴ Etu to ekjon manu pora tai laga nokorkhan ke adhikar dikene, taikhan sobke nijor kaam dikene aru chokidar ke bhal pora sob sai thaki bole hukum dikene dusra jagate jai ja nisena ase. ³⁵ Karone hoshiar thakibi, kelemane tumikhan najane, malik kitia ghor te ahibo, saam te hobo na adha rati te hobo, na murga hala kora homoi te hobo, nohoile phojurte hobo. ³⁶ Tai achanak ahikena tumikhan ghumai thaka pai jabo pare. ³⁷ Etu pora Moi tumikhan ke ki koise, Moi sobke koi ase; Hoshiar hoi thakibi!”

14

Jisu Ke Morabo Nimite Buddhi Kora

¹ Dui din pichete Khomir Nathaka Roti laga Purbb hobole asele. Aru prodhan purohit khan aru niyom likha khan kineka kori Taike thogai dikene morai dibole bisari asele. ² Kintu taikhan apaste eneka koi thakise, “Purbb dinte eneka nohobo lage, kelemane manu majote gondugol kori biya hoi jabo.”

Bethany Te Jisu Ke Abhishek Kora

³ Jitia Jisu Bethany te Simon junke korhi bemar thakise, tai laga ghor te kha luwa kori bole bohi asele, ekjon mahila ekta alabaster daba te bisi daam laga abhishek kora shudh tel loi anise. Aru tai etu khuli kene Jisu laga matha te hali dise. ⁴ Kintu kunba biya paikene ekjon-ekjon ke koise, “Kile etu abhishek tel borbad kori ase?”

⁵ Kilekoile etu tel bikiri korile tin-sou dinar pora bhi bisi pabo, aru loi kene dukhiya khan ke dibo pare.” Eneka hoi kene taikhan tai bhirodh te kotha korise. ⁶ Kintu Jisu pora taikhan ke koise, “Taike chari- dibi, tumikhan kele taike digdar kori ase? Tai Moi karone bhal kaam korise. ⁷ Dukhiya khan hodai tumikhan logote thakibo, aru jitia itcha hoi, taikhan ke bhal kaam koribo pare, kintu Moi hodai tumikhan logote nathakibo* . ⁸ Tai ki koribo pare, etu tai kori dise. Moike matite moidam diya age te tai tel loi kene Moi laga gaw te haali kene abhishek kori dise. ⁹ Moi tumikhan ke hosa kobo, pura prithibi te susamachar prochar kori juwa te etu mahila kori diya laga kotha bhi taike yaad thakibo karone kobo.”

Judas Pora Jisu ke Thogai Diya

¹⁰ Titia Iscariot Judas baroh jon majot te ekjon asele, Jisu ke dhori dibole prodhan purohit khan logote jaise. ¹¹ Aru etu huni kene taikhan bisi khushi hoi kene taike poisa dibole koi dise, karone tai etu somoi pora Taike dhori dibole bhal somoi sai thakise.

Chela Khan Logot Nistar Purbb

¹² Khomir nathaka Roti Purbb laga prothom din, jitia taikhan Nistar laga mer bacha ke bolidan di thakise, Tai chela khan Taike hudise, “Kun jagah te amikhan Nistar purbb nimite taiyar kori bole Apuni laga itcha ase?†” ¹³ Aru Tai duijon chela ke pathai kene koise, “Sheher

* **14:7** 14.7 Due. 15:11. † **14:12** 14.12 Exo. 12:6, 15.

te jabi, aru ekjon ekta kolsi te pani loi juwa pai jabo, tai piche-picche jabi. ¹⁴ Aru kot te tai jabo ta te tumi bhi jabi, aru jai kene ghor malik ke kobi, 'Shika manu koise, "Alohi khan karone jagah kot te ase? Ami laga chela khan logote kot te Nistar khabo?" " ¹⁵ Titia tai sapha kori rakhi thaka uporte ekta kamra dikhai dibo, ta te amikhan karone taiyar kori kene rakhibi." ¹⁶ Titia tai laga duijon chela sheher te ahise, aru jineka Tai taikhan ke koise thik tineka paise aru taikhan Nistar nimite taiyar kori rakhise.

¹⁷ Jitia saam hoise, Jisu aru chela baroh jon ahise. ¹⁸ Jitia taikhan khai asele titia Jisu koise, "Moi tumikhan ke hosa kobo, tumikhan majote ekjon jun Moi logote kha luwa kori ase tai Moike thogai dibo.‡" ¹⁹ Aru taikhan bisi mon dukh hoise, aru Taikhan ekjon-ekjon kori sob Taike hudise, "Etu moi ase?" ²⁰ Tai taikhan ke jowab di koise, "Etu baroh jon te ekjon ase, jun Moi logote eke thali te bhi jai kene khai ase. ²¹ Keleman Manu laga Putro nimite jineka Isor laga kotha te likhi rakhise, tineka hoi ase. Kintu jun pora Manu laga Putro ke thogai di dise, taike hai ase! Tai to jonom nohoile he tai nimite bhal hobo asele."

Probhu Bhoj Shuru Kora

²² Aru jitia taikhan khai thakise, titia Jisu roti loise aru dhonyabad diya pichete bhangai se, aru taikhan ke eneka koi kene dise, "Lobi aru khabi. Etu Ami laga gaw ase." ²³ Titia Tai kup loi kene Isor ke dhanyavad dise aru taikhan ke

‡ **14:18** 14.18 Psa. 41:9.

dise. Aru taikhan sob etu pora pi loise. ²⁴ Aru Tai taikhan ke koise, “Etu khun to bisi manu karone Moi bahai diya khun laga vachan ase§. ²⁵ Moi tumikhan ke hosa kobo, Isor laga rajyote notun angur phol laga ros napiya tak Moi aru etu napibo.”

Peter Pora Jisu Ke Ashikar Kori bole Thaka Jisu Koi Diya

²⁶ Aru titia taikhan gana kori loise, taikhan Oliv Pahar te jai jaise. ²⁷ Titia Jisu taikhan ke koise, “Tumikhan sob Moike charikena jai jabo, etu Isor kotha te likha ase, ‘Moi roikhya ke maribo Aru mer khan ephale-uphale hoi jabo.’

²⁸ Kintu Moi jee utha pichete tumi pora age Galilee te jai jabo.” ²⁹ Kintu Peter Taike koise, “Jodi sob manu giri le bhi, moi to nohobo.” ³⁰ Jisu taikhe koise, “Moi tumike hosa kobo, aji rati murga duibar hala nakora age te tumi tin bar Moike najana kobo.” ³¹ Kintu tai aru jor pora koise, “Jodi Apuni logote moribo koile bhi, moi Apuni ke kitia bhi najana nokobo.” Aru sob chela khan bhi tineka koise.

Gethsemane Te Jisu Prathana Kora

³² Titia taikhan Gethsemane naam ekta jagate ahise, aru Jisu Tai chela khan ke koise, “Moi prathana kori thaka somoite yate bohibi.” ³³ Aru Tai Peter, James aru John ke loi kene tai logote jaise, aru Tai bisi dukh aru chinta bhabona hoise. ³⁴ Tai koise, “Ami laga atma bisi dukh

§ 14:24 14.24 Exo. 24:8; Zec. 9:11.

hoise, mori bole nisena. Na ghumai kene yate rukhi thakibi.*”³⁵ Titia olop dur jai kene, Jisu niche giri prathana korise, jodi parile etu somoi ke Tai pora dur kori dibole.³⁶ Aru Tai koise, “Abba, Baba Apuni to sob koribo pare. Moi pora etu kup hatai dibi. Hoile bhi Ami laga itcha nohoi kintu jineka Apuni laga itcha ase, eneka koribi.”³⁷ Titia Tai ahikena tinjon to ghumai thaka paise aru Peter ke koise, “Hey Peter, tumi ghumai jaise? Tumi ek-ghanta bhi rukhibo napare?”³⁸ Tumikhan porikha te nagiribo karone na ghumai kene prathana kori thakibi, Atma to taiyar ase kintu gaw to komjur ase.”³⁹ Aru Tai jai kene age te kowa nisena koi kene prathana korise.⁴⁰ Aru jitia Tai wapasa ahise, arubi tinjon ke ghumai thaka paise kelemane taikhan laga suku nindh pora bharta asele. Aru Taike ki jowab dibo najana hoi thakise.⁴¹ Titia tin-bar ahi kene taikhan ke koise, “Tumikhan etiya bhi aram pora ghumai ase? Hoise! Somoi ponchise. Sabi! Manu laga Putro ke dhori kene paapi khan laga hathte di dibole hoise.”⁴² Uthibi, amikhan jai jabo, sabi, Moike thoga manu usor ase.”

Jisu Ke Thogai Kena Dhori Luwa

⁴³ Aru tai etu kotha koi thaka somoite, Judas baroh jon te ekjon to, prodhan purohit, likha manu aru bura khan pora pathai diya talwar, lathi aru bisi manu loi ahise.⁴⁴ Taike thogai diya manu taikhan ke ekta chihna disele, “Junke moi chuma dibo, etu ase, Taike dhori lobi, aru dhuri kene loijabi.”⁴⁵ Aru jitia Judas ahise, tai

* **14:34** 14.34 Psa. 42:5.

joldi ahi kene Jisu ke koise, “Rabbi,” aru Taike chuma dise. ⁴⁶ Titia taikhan ahi kene hath pora Taike dhori loise. ⁴⁷ Aru ta te usorte khara thaka ekjon talwar ulaikene moha purohit laga nokor uporte cholai dise, aru tai laga kan kati dise. ⁴⁸ Titia Jisu taikhan ke jowab dise, “Tumikhan Moike daku bhabi kene Moike dhori bole talwar aru lathi loi ahise? ⁴⁹ Moi hodai din mondoli te tumikhan logote bohi prochar kori thakise, aru tumikhan Moike dhora nai, kintu Shastro te likha pura hobo karone eneka hoise.” ⁵⁰ Titia Jisu laga chela khan sob Taike chari kene polai jaise†.

Jawan Putro Ekjon Pola

⁵¹ Aru ekjon jawan chokra kapra napindi kene bodon te ekta mihin kapra lagai kene Jisu laga piche kori ahi thakise. Aru kunba manu khan pora taikhe dhori loise, ⁵² kintu tai pindhi thaka mihin kapra chari dise aru eku kapra napindhi kene polai jaise.

Sabha Age Te Jisu Ke Khara Kora

⁵³ Aru taikhan Jisu ke loi kene moha purohit logote jaise, aru ta te prodhan purohit khan, niyom likha khan aru bura khan sob joma hoise. ⁵⁴ Kintu Peter dur hoi kene Tai piche-piche ahi moha purohit laga veranda te nokorkhan logote jui thapi thakise. ⁵⁵ Titia prodhan purohit aru sob maha sabha Taike morai dibole Jisu laga bhirodh misa kotha bisarise kintu eku pa-a nai. ⁵⁶ Keleman bisi manu Tai bhirodh te misa kotha koi dise, kintu taikhan laga kotha thik mila nai. ⁵⁷ Titia kunba khara hoi kene Tai bhirodh

† **14:50** 14.50 Psa. 88:18.

te misa kotha di koise. ⁵⁸ “Tai eneka kowa amikhan hunise, ‘Moi manu hath pora bonai rakha etu mondoli ke bhangai dikene, aru tin dinte dusra juntu hath pora bona nohoi, etu ke bonai dibo.” ⁵⁹ Kintu titia bhi taikhan laga kotha thik milabo para nai. ⁶⁰ Aru moha purohit taikhan majote uthi kene Jisu ke hudise, “Apuni eku bhi nokobo? Manu khan Apuni bhirodh te ki koi ase?” ⁶¹ Kintu Tai ekdom chup thakise. Aru eku jowab diya nai. Aru moha purohit Taike hudi koise. “Apuni Dhoinyo Jon laga Putro Khrista ase?” ⁶² Jisu koise, “Moi ase; Aru tumikhan dikhibo Manu laga Putro ke dikhibo

Jitia Tai hokti laga dyna hath phale bohobo

Aru akas laga badal pora ahi thaka dikhibo‡.”

⁶³ Titia moha purohit bisi ghusa hoi kene tai laga kapra phatai kene koise, “Etiya amikhan ki gawah dibo lage? ⁶⁴ Apuni khan bhi Isor laga ninda kowa hunise. Apuni khan ki bhabi ase?” Aru taikhan sob taike morai dibo lage koise§.

⁶⁵ Titia kunba Tai uporte thuki se, aru tai laga mukh dhakai dise, aru Taike marikena koise, “Bhabobani kobi!” Aru daruga khan bhi Taike loi jaise aru thapor marise.

Peter He Jisu Ke Ashikar Kora

⁶⁶ Etu homoi te Peter nichete bohi asele aru moha purohit laga nokorni ta te ahise. ⁶⁷ Aru taikhe koise, “Tumi bhi Nazareth Jisu logote asele nohoi?” ⁶⁸ Kintu tai nohoi koise, “Moi najane, tumi ki koi ase moi bujhi panai.” Aru tai bahar

‡ **14:62** 14.62 Dan. 7:13; Psa. 110:1. § **14:64** 14.64 Lev. 24:16.

ulai jaise. ⁶⁹ Aru etu nokorni taike aru dikhi kene usor thaka khan ke koise, “Etu manu bhi taikhan logot ekjon ase!” ⁷⁰ Kintu tai nohoi koi dise, aru olop, pichete ta te khara thaka ekjon pora Peter ke koise, “Hosa ase, tumi bhi taikhan majote ekjon ase, kelemane tumi bhi Galilee manu ase.” ⁷¹ Titia Tai shrap di kosom khai koise, “Apuni jun laga kotha koi ase moi etu manu ke najane.” ⁷² Aru titia dusra bar murga hala korise. Titia Peter Jisu kowa kotha ke bhabona korise, “Murga duibar hala kora age te tumi Moike tin-bar najane kobo,” aru titia tai etu kotha bhabi kene kandise.

15

Jisu Ke Pilate Logot Te Dise

¹ Dusra din phojur huwa loge-loge mukhyo purohit khan pora niyom likha khan, bura khan aru pura sabha manu khan kotha milai kene Jisu ke bandi Pilate laga hathte di dise. ² Pilate pora Jisu ke hudise, “Tumi Yehudi laga raja ase?” Tai jowab di taike koise, “Apuni kowa to ase.” ³ Aru purohit khan Taike bisi kotha te bodnam lagaise. ⁴ Titia Pilate Taike koise, “Apuni eku jowab nadibo? Sabi taikhan Tumi laga bhirodh te ki bodnam lagai ase?” ⁵ Kintu Jisu eku kowa nai, karone Pilate bisi asurit hoise.

⁶ Aru etu purbb somoi ekta manu bondhi te thaka ke chari dibole niyom thake, kunke taikhan chari dibole itcha kore. ⁷ Aru ta te Barabbas naam ekjon manu morai diya taikhan logote bondhi te asele aru jun he bhirodh kori kene manu morai disele. ⁸ Titia bhir pora taike

binti korise jineka niyom kori ahise tineka kori dibi koi kene jor pora hala korise. ⁹ Kintu Pilate taikhan ke jowab di koise, “Moi tumikhan nimite Yehudi laga Raja ke chari dibo naki?” ¹⁰ Kelemanee tai jani asele mukhyo purohit khan he Taike suku joli kene dhori taike di dise. ¹¹ Kintu mukhyo purohit khan pora Barabbas taikhan ke dibi koi kene manu khan ke chukuli kori dise. ¹² Aru Pilate koise, “Tinehoile moi tumikhan Yehudi laga Raja Taike ki kori dibo?” ¹³ Etu karone taikhan aru hala kori koise, “Taike Cross te mari dibi!” ¹⁴ Titia Pilate taikhan ke koise, “Kile, Tai ki biya kaam korise?” Kintu taikhan aru bisi jor pora hala kori kene koise, “Taike ke Cross te mari dibi.” ¹⁵ Karone Pilate bisi manu ke khushi kori dibo itcha pora Barabbas ke taikhan nimite chari dise, aru Jisu ke chabuk mari kene Taike Cross te mari bole di dise.

Jisu Ke Ninda Kora

¹⁶ Titia sipahi khan Taike raja laga darbar - kuntu ke Praetorium koi- ta te loi jaise aru pura platon joma kori loise. ¹⁷ Aru taikhan begoni rong kapra Taike pindhai dise, aru katta thaka laga mukut bonai kene Tai laga matha te rakhidise. ¹⁸ Aru Taike eneka koi thakise: “Salam, Yehudi laga Raja!” ¹⁹ Titia taikhan ekta lathi loi kene Tai matha te mari thakise, aru Tai upor thuk phelaise aru athukari kene taike sonman kora nisena kori thakise. ²⁰ Jitia Taike dhamali kori loise, Taike age te begoni rong kapra pindhai diya to ulaikene Tai nijor kapra

lagai dise, aru Taike Cross te mari dibole bahar te loi jaise.

Cross Te Mora

²¹ Titia taikhan Cyrene desh laga Alexander aru Rufus laga baba Simon, jun desh pora ahi asele, taikhe joborjosti Jisu laga Cross ke loi jabile dhori loise*.

²² Aru taikhan Taike Golgotha- naam motlob ase, “Matha Hardi laga jaga”- ta te loi anise.

²³ Taike tita pani draikha ros logot milai kene khabo dibole bisarise, kintu Tai etu khanai.

²⁴ Aru Taike Cross te mari dise, aru chithi kheli kene Tai laga kapra bhag kori loise kun ki pabo koi kene†.

²⁵ Aru tin ghanta somoite taikhan Taike Cross te mari dise. ²⁶ Aru Tai matha uporte Tai laga golti likhi dise, “Yehudi Khan Laga Raja” koi kene.

²⁷ Aru Rome sipahi khan pora duita chor bhi Cross te mari dise, ejkon Tai dyna phale, aru dusra Tai laga baya phale. ²⁸ Aru Taike golti thaka khan logote ginti kori loise koi kene

Shastro te likhi diya kotha pura hoise‡. ²⁹ Aru rasta te aha juwa kori thaka khan sob nijor

laga matha hilai kene hinsa korise, “Ha! Tumi mondoli bhangai dikene, aru tin dinte bonai dibo kowa manu§.

³⁰ Cross pora niche nami ahi bhi aru nije ke bachai lobi!” ³¹ Tineka mukhyo purohit khan bhi niyom likha khan logote mili

Taikhe hinsa kori koise, “Tai dusra ke to bachai thake, kintu Tai nije ke bachabo napare. ³² Israel

* **15:21** 15.21 Cyrene to Uttor Africa te Cyrenaica jaga laga prodhan sheher ase. † **15:24** 15.24 Psa. 22:18. ‡ **15:28** 15.28 Isa. 53:12. § **15:29** 15.29 Psa. 22:7; 109:25.

laga Raja Khrista etiya Cross pora niche namibi, amikhan bhi dikhi kene biswas kori bole,” aru junke Tai logote Cross te disele taikhan bhi Taike ninda korise.

Jisu Mora Laga

³³ Aru titia choi ghanta somoi hoise, ta te pura desh te baroh baji pora tin baji tak andhera hoi jaise. ³⁴ Aru tin baji laga homoi te Jisu jor pora hala kori koise, “Eloi, Eloi lama sabachthani?” Motlob ase, “Ami laga Isor, Ami laga Isor, kele Apuni Amike chari dise?” ³⁵ Jun manu khan Tai usorte khara asele, taikhan etu huni kene koise, “Sabi Tai Elijah ke mati ase.” ³⁶ Titia kunba ekjon polaikena spanj jinis ani kene tenga panite bhi jaise aru ekta nol pora Taike khabole dise, aru koise, “Tai ekla ke chari bhi aru sabi, Elijah ahikena Taike namai dibo na nai amikhan sabo!*” ³⁷ Aru Jisu jor pora hala kori Tai laga atma di dise. ³⁸ Titia girja laga porda upor pora niche tak phati kene dui tukra hoise. ³⁹ Ekjon henapoti Tai samne te khara thakisele. Jitia Jisu saas charikena morise, etu dikhi kene tai koise, “Hosa ase, etu manu he Isor laga Putro ase.” ⁴⁰ Ta te kunba mahila khan asele jun dur pora sai thakise, Mary Magdalene, aru Mary -chutu James aru Joses laga ama,- aru Salome. ⁴¹ Jitia Tai Galilee te thakisele, eitu khan Tai laga piche-piche ahi Taike sewa kori thakisele, aru bisi mahila khan bhi asele, jun Tai logot te Jerusalem te ahise.

Jisu Ke Kobor Diya

* **15:36** 15.36 Psa. 69:21.

⁴² Aru saam hoise, etu Taiyar Din asele, Bisram din laga ek din age†. ⁴³ Arimathea nogor te thaka manu Joseph ahise. Tai sabha laga dangor manu asele, aru tai Isor laga rajyo aha rukhi thaka manu asele. Tai mon dangor pora Pilate logote jai kene Jisu laga gaw mangise. ⁴⁴ Pilate asurit hoise, Tai joldi morise koi kene, aru henapoti ke mati ani kene Jisu morise na nai etu hudise. ⁴⁵ Jitia tai henapoti pora jani loise, titia Jisu laga gaw Joseph ke dibole koi dise. ⁴⁶ Aru Joseph pora Jisu laga gaw namai kene bhal norom kapra pora bandi kene, Taike pathor pora bona kobor te rakhidise, aru kobor laga dorjate ekta pathor pora bondh kori dise. ⁴⁷ Aru Mary Magdalene aru Joses laga ama Mary bhi Jisu laga gaw kot te rakhise etu ahikena saise.

16

Punoruthan

¹ Jitia Bisram din khotom hoise, titia Mary Magdalene, James laga ama Mary aru Salome taikhan logot mitha sugandh thaka tel khan anise, Jisu ke abhishek kori dibole. ² Aru hapta laga prothom din* te eksom phojurte suryo ula loge-loge taikhan kobor te ahise. ³ Aru taikhan majot eneka kotha koi thakise, “Kun pora amikhan nimite kobor laga dorja pora pathor hatai dibo?” ⁴ Kintu jitia taikhan ta te punchikena saise, etu dangor pathor to hati kene thaka paise. ⁵ Aru kobor bhitor te jai kene taikhan jawan manu ekjon lamba boga kapra

† 15:42 15.42 Friday din. * 16:2 16.2 Sunday

pindhi kene dyna phale bohi thaka paise, titia taikhan bisi bhoi khaise. ⁶ Kintu tai taikhan ke koise, “Bhoi na koribi. Tumikhan Nazareth Jisu ke bisari ase, junke Cross te mari disele. Tai jee uthijaise. Tai yate nai. Taike kote rakhise etu jagah sabi. ⁷ Kintu tumikhan jai kene Tai chela khan aru Peter ke koi dibi, ‘Tai tumikhan laga age Galilee te punchi ase, ta te tumikhan Taike pai jabo, jineka Tai tumikhan ke koisele.’ ”

⁸ Karone taikhan kobor pora ulaikene polai jaise, kelemane taikhan kapi aru hairan hoise, taikhan kunke bhi eku kowa nai kelemane taikhan bhoi lagi sele.

Mary Magdalene Logote Jisu Pora Nijorke Dikhai Diya

⁹ Titia hapta laga prothom din[†] te, Tai jee uthija-a pichete, Tai sob pora age Mary Magdalene, jun pora Tai sat-ta bhoot ulai disele, etu ke dikhai dise. ¹⁰ Aru Mary Magdalene jai kene Jisu laga chela khan ke koi dise, jun khan bisi mon dukh hoi kene kandi thakisele. ¹¹ Aru jitia taikhan Jisu jinda hoise koi kene hunise, aru taikhe dikhise, kintu taikhan biswas kora nai.

Chela Duijon Logot Te Jisu Ahi Dikhai Diya

¹² Etu pichete Tai alag chehera hoi kene duijon chela ke dikhai dise, jitia taikhan dusra desh te jai asele. ¹³ Tai duijon Jerusalem te wapas jai kene taikhan ke koise, kintu taikhan pora duijon ke biswas kora nai.

Dangor Adhikar

14 Pichete jitia egaroh jon chela khan khabole bohi asele, Jisu ahi kene taikhan ke dikhai dise, aru taikhan mon tan huwa aru biswas nathaka karone taikhan ke galise. Kelemanee Tai jee utha pichete jun khan pora Taike dikhise koise eitu khan laga kotha biswas kora nai . 15 Aru Jisu taikhan ke koise, “Tumikhan prithibi sob te jai kene sob sristi khan ke etu susamachar jonai dibi. 16 Jun manu biswas kore aru baptizma lobo, taikhan bachibo kintu jun biswas nokorile taike nosto kori dibo. 17 Aru biswas kora khan logote etu chihna thakibo, taikhan Moi laga naam te bhoot khan ke khedai dibo aru taikhan alag-alag bhasha te kobo. 18 Taikhan saph ke uthai lobo, aru taikhan jodi jeher khai le bhi eku biya nohobo, taikhan bemaar manu uporte hath rakhile bhal hoi jabo.”

19 Titia Probhu Jisu taikhan logote kotha kowa pichete Taike sorgote uthai loi jaise, aru Isor laga dyna hathte bohi jaise‡. 20 Aru taikhan jai kene sob jagah te prochar kori jaise, aru Probhu pora taikhan logote ki kaam korise aru vachan dise, etu ke loi proman kori jai thakise.

‡ **16:19** 16.19 1 Pet. 3:22.

**Indian Standard Version (ISV) Nagamese
The New Testament in the Naga Pidgin language of
India: Indian Standard Version (ISV) Nagamese**

copyright © 2019 Bridge Connectivity Solutions

Language: Nagamiz (Naga Pidgin)

Contributor: Bridge Connectivity Solutions Pvt. Ltd.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

PDF generated using Haiola and XeLaTeX on 21 Feb 2024 from source files dated 23 Apr 2023

302d590c-b57a-5734-9dcb-8a22ed7685c4